



05746

通志卷第一百

宋 右 迪 功 郎 鄭 樵 粟 漁 仲 撰

列傳第十三

前漢

霍光 禹 金日磾 賞 敏 趙充國 辛慶忌 傅介

子 常惠 鄭吉 甘延壽 陳湯 段會宗

胡建 朱雲 梅福 云敞 雋不疑 疏廣 受

子定國 于 薛廣德 平當 晏 彭宣 王吉 駿 貢禹

兩龔 鮑宣

霍光字子孟驃騎將軍去病弟也父中孺河東平陽人

通志

卷四

列傳十三

一

以縣吏給事平陽侯家與侍者衛少兒私通而生去病
中孺吏畢歸家娶婦生光因絕不相聞久之少兒女弟
子夫得幸於武帝立為皇后去病以皇后姊子貴幸既
壯大乃自知父為霍中孺未及求問會為驃騎將軍擊
匈奴道出河東河東太守郊迎負弩矢先驅至平陽傳
舍去病遣吏迎霍中孺中孺趨入拜謁將軍迎拜因跪
曰去病不早自知為大人遺體也中孺扶服叩頭曰老
臣得託命將軍此天力也去病大為中孺買田宅奴婢
而去還復過焉乃將光西至長安時年十餘歲任光為
郎稍遷諸曹侍中去病死後光為奉車都尉光祿大夫

出則奉車入侍左右出入禁闥二十餘年小心謹慎未嘗有過甚見親信征和二年衛太子爲江充所敗而燕王旦廣陵王胥皆多過失是時上年老寵姬鉤弋趙婕妤有男上心欲以爲嗣命大臣輔之察羣臣唯光任大重可屬社稷上迺使黃門畫者畫周公負成王朝諸侯以賜光後元二年春上游五柞宮病篤光涕泣問曰如有不諱誰當嗣者上曰君未諭前畫意邪立少子君行周公之事光頓首讓曰臣不如金日磾日磾亦曰臣外國人不如光上以光爲大司馬大將軍日磾爲車騎將軍及太僕上官桀爲左將軍榕粟都尉桑弘羊爲御史大夫皆拜臥內牀下受遺詔輔少主明日武帝崩太子襲尊號是爲孝昭皇帝帝年八歲政事壹決於光先是後元年侍中僕射莽何羅與弟重合侯通謀爲逆時光與金日磾上官桀等共誅之功未錄武帝病封璽書帝崩發書以從事遺詔封金日磾爲稅侯上官桀爲安陽侯光爲博陸侯皆以前捕反者功封時衛尉王莽天水人字叔子男忽侍中揚語曰帝病忽常在左右安得遺詔封三子事羣兒自相貴耳光聞之切責王莽莽酖殺忽光爲人沈靜詳審長財七尺三寸白晢疏眉目美須髯每出入下殿門止進有常處郎僕射竊識視之不失尺寸

通志

卷四

列傳十二

二

其資性端正如此初輔幼主政自己出天下想聞其風
采殿中嘗有怪一夜羣臣相驚光召尙符璽郎郎不肯
授光光欲奪之郎按劍曰臣頭可得璽不可得也光甚
義之明日詔增此郎秩二等衆庶莫不多光光與左將
軍桀結婚相親光長女爲桀子安妻有女年與帝相配
桀因帝姊鄂邑蓋主內安女後宮爲婕妤數月立爲皇
后父安爲驃騎將軍封桑樂侯光時休沐出桀輒人代
光決事桀父子既尊盛而德長公主公主內行不脩幸
河閒丁外人桀安欲爲外人求封幸依國家故事以列
侯尙公主者光不許又爲外人求光祿大夫欲令得召

通志

卷福

列傳十三

三

見又不許長主太以是怨光而桀安數爲外人求官爵
弗能得亦慙自先帝時桀已爲九卿位在光右及父子
竝爲將軍有椒房中宮之重皇后親安女光迺其外祖
而顧專制朝事繇是與光爭權燕王旦自以昭帝兄常
懷怨望及御史大夫桑弘羊建造酒榷鹽鐵爲國興利
伐其功欲爲子弟得官亦怨恨光於是蓋主上官桀安
及弘羊皆與燕王旦通謀詐令人爲燕王上書言光出
都肄郎羽林道上稱趨太官先置又引蘇武前使匈奴
二十年不降還乃爲典屬國而大將軍長史敞亡功爲
椽粟都尉又擅調益莫府校尉光專權自恣疑有非常

臣旦願歸符璽入宿衛察姦臣變候司光出沐日奏之
桀欲從中下其事桑弘羊當與諸大臣共執退光書奏
帝不肯下明旦光聞之止畫室中不入上問大將軍安
在桀對曰以燕王告其罪故不敢入有詔召大將軍光
入免冠頓首謝上曰將軍冠朕知是書詐也將軍亡罪
光曰陛下何以知之 upper 曰將軍之廣明都郎屬耳調校
尉以來未能十日燕王何以得知之且將軍爲非不須
校尉是時帝年十四尙書左右皆驚而上書者果亡捕
之甚急桀等懼自上小事不足遂上不聽後桀黨與有
譖光者上輒怒曰大將軍忠臣先帝所屬以輔朕身敢
有譖光者坐之自是桀等不敢復言乃謀令長公主置
酒請光伏兵格殺之因廢帝迎立燕王爲天子事發覺
光盡誅桀安弘羊外人宗族燕王蓋主皆自殺光威震
海內昭帝旣冠遂委任光訖十三年百姓充實四夷賓
服元光元年昭帝崩無嗣武帝六男獨有廣陵王胥在
羣臣議所立咸持廣陵王王本以行失道先帝有不用
光內不自安郎有上書言周太王廢太伯立王季文王
舍伯邑考立武王唯在所宜雖廢長立少可也廣陵王
不可以承宗廟言合光意光以其書視丞相敞等擢郎
爲九江太守卽日受皇太后詔遣行大鴻臚事少府樂

成宗正德光祿大夫吉中郎將利漢迎昌邑王賀賀者
武帝孫昌邑哀王子也既至卽位行淫亂光憂懣獨以
間所親故吏大司農田延年延年曰將軍爲國柱石審
此人不可何不建白太后更選賢而立之光曰今欲如
是於古嘗有此不延年曰伊尹相殷廢太甲以安宗廟
世稱其忠將軍若能行此亦漢之伊尹也光乃引延年
給事中陰與車騎將軍張安世圖計遂召丞相御史將
軍列侯中二千石大夫博士會議未央宮光曰昌邑王
行昏亂恐危社稷如何羣臣皆驚愕失色莫敢發言但
唯唯而已田延年前離席按劍曰先帝屬將軍以幼孤
寄將軍以天下以將軍忠賢能安劉氏也今羣下鼎沸
社稷將傾且漢之傳諡常爲孝者以長有天下今宗廟
血食也如令漢家絕祀將軍雖死何面目見先帝於地
下乎今日之議不得旋踵羣臣後應者臣請斬之光謝
曰九卿責光是也天下匈匈不安光當受其難於是議
者皆叩頭曰萬姓之命在於將軍唯大將軍令光卽與
羣臣俱見白太后具陳昌邑王不可以承宗廟狀皇太
后迺車駕幸未央承明殿詔諸禁門毋內昌邑羣臣王
入朝太后還乘輦欲歸溫室中黃門宦者各持門扇王
入門閉昌邑羣臣不得入王曰何爲大將軍跪曰有皇

通志

卷四

列傳十三

五

太后詔毋內昌邑羣臣王曰徐之何迺驚人如是光使盡驅出昌邑羣臣置金馬門外車騎將軍安世將羽林騎收縛二百餘人皆送廷尉詔獄令故昭帝侍中中臣侍守王光敕左右謹宿衛卒有物故自裁令我負天下有殺主名王尙未自知當廢謂左右我故羣臣從官安得罪而大將軍盡繫之乎頃之有太后詔召王王聞召意恐迺曰我安得罪而召我哉太后被珠襦盛服坐武帳中侍御數百人皆持兵器門武士陛戟陳列殿下羣臣以次上殿召昌邑王伏前聽詔光與羣臣連名奏王尙書令讀奏曰丞相臣敞大司馬大將軍臣光車騎將軍臣安世度遼將軍臣朋友前將軍臣增後將軍臣充國御史大夫臣誼宜春侯臣譚當塗侯臣聖隨桃侯臣昌樂杜侯臣屠耆堂太僕臣延年太僕臣昌大司農臣延年宗正臣德少府臣樂成廷尉臣光執金吾臣延壽大鴻臚臣賢左馮翊臣廣明右扶風臣德長信少府臣嘉典屬國臣武京輔都尉臣廣漢司隸校尉臣辟兵諸吏文學光祿大夫臣遷臣畸臣吉臣賜臣管臣勝臣梁臣長幸臣夏侯勝太中大夫臣德臣卬昧死言皇太后陛下臣敞等頓首死罪天子所以永保宗廟總壹海內者以慈孝禮誼賞罰爲本孝昭皇帝早棄天下亡嗣臣

通志

卷四

列傳十三

六

做等議禮曰爲人後者爲之子也昌邑王宜嗣後遣宗正大鴻臚光祿大夫奉節使徵昌邑王典喪服斬縗七悲哀之心廢禮誼居道上不素食使從官略女子載衣車內所居傳舍始至謁見立爲皇太子常私買雞豚以食受皇帝信璽行璽大行前就次發璽不封從官更持節引內昌邑從官騶宰官奴二百餘人常與居禁闥內敖戲自之符璽取節十六朝暮令聖從官更持節從爲書曰皇帝問侍中君卿使中御府令高昌奉黃金千斤賜君卿取十妻大行在前殿發樂府樂器引內昌邑樂人擊鼓歌吹作俳優會下還上前殿擊鐘磬召內泰壹

通志

卷宿

列傳十三

七

宗廟樂人輦道卒首鼓吹歌舞悉奏衆樂發長安廚三太牢具祠閣室中祀已與從官飲昭駕法駕皮軒鸞旗驅馳北宮桂宮弄鹿鬪虎召皇太后御小馬車使官奴騎乘遊戲掖庭中與孝昭皇帝宮人蒙等淫亂詔掖庭令敢泄言要斬太后曰止爲人臣子當悖亂如是邪王離席伏尚書令復讀曰取諸侯王列侯二千石綬及墨綬黃綬以并佩昌邑郎官者免奴變易節上黃旄以赤發御府金錢刀劍玉器采繪賞賜所與遊戲者與從官官奴夜飲湛沔於酒詔太官上乘輿食如故食監奏未釋服未可御故食復詔太官輒具無闕食監太官不敢

具卽使從官出買雞豚詔殿門內以爲常獨夜設九賓
溫室延見姊夫昌邑關內侯祖宗廟祠未舉爲璽書使
使者持節以三太牢祠昌邑哀王園廟稱嗣子皇帝受
璽以來二十七日使者旁午持節詔諸官署徵發凡一
千一百二十七事文學光祿大夫夏侯勝等及侍中傅
嘉數進諫以過失使人薄責勝縛嘉繫獄荒淫迷惑失
帝王禮誼亂漢制度臣敞等數進諫不變更日以益甚
恐危社稷天下不安臣敞等謹與博士臣霸臣雋舍臣
德臣虞舍臣射臣倉議皆曰高皇帝建功業爲漢太祖
孝文皇帝慈仁節儉爲太宗今陛下嗣孝昭皇帝後行
淫辟不軌詩云藉曰未知亦旣抱子五辟之屬莫大不
孝周襄王不能事母春秋曰天王出居于鄭繇不孝出
之絕之於天下也宗廟重於君陛下未見命於高廟不
可以承天序奉祖宗廟子萬姓當廢臣請有司御史大
夫臣諱宗正臣德太常臣昌與太祝以一太牢具告祠
高廟臣敞等昧死以聞皇太后詔曰可光令王起拜受
詔王曰聞天子有爭臣七人雖亡道不失天下光曰皇
太后詔廢安得天子迺卽持其手解脫其璽組奉上太
后扶王下殿出金馬門羣臣隨送王西面拜曰愚贛不
任漢事起就乘輿副車大將軍光送至昌邑郎光謝曰

王行自絕於天臣等驚怯不能殺身報德臣寧負王不
敢負社稷願王自愛臣長不復見左右光涕泣而去羣
臣奏言古者廢放之人屏於遠方不及以政請徙王賀
漢中房陵縣太后詔歸賀昌邑賜湯沐邑二千戶昌邑
羣臣坐無輔導之誼陷王於惡光悉誅殺二百餘人出
死號呼市中曰當斷不斷反受其亂光坐庭中會丞相
以下議定所立廣陵王已前不用及燕刺王反誅其子
不在議中近親唯有衛太子孫號皇曾孫在民間咸稱
述焉光遂復與丞相敞等上奏曰禮曰人道親親故尊
祖尊祖故敬宗太宗亡嗣擇支子孫賢者爲嗣孝武皇

通志

卷四

列傳十三

九

帝曾孫病已武帝時有詔掖庭養視至今年十八師受
詩論語孝經躬行節儉慈仁愛人可以嗣孝昭皇帝後
奉承祖宗廟子萬姓臣昧死以聞皇太后詔曰可遣宗
正劉德至曾孫家尙冠里洗沐賜御衣太僕以軫獵車
迎曾孫就齋宗正府入未央宮見皇太后封爲陽武侯
已而光奉上皇帝璽綬謁于高廟是爲孝宣帝明年下
詔曰夫褒有德賞元功古今通誼也大司馬大將軍光
宿衛忠正宣德明恩守節秉誼以安宗廟其以河北東
武陽益封光萬七千戶與故所食邑凡二萬戶賞賜前
後黃金七千斤錢六千萬雜繒三萬匹奴婢百七十人

馬二千匹甲第一區自昭帝時光子禹及兄孫雲皆中郎將雲弟山奉車都尉侍中領胡越兵光兩女婿爲東西宮衛尉昆弟諸壻外孫皆奉朝請爲諸曹大夫騎都尉給事中黨親連體根據於朝廷光自後元秉持萬機及上卽位乃歸政上謙讓不受諸事皆先關白光然後奏御天子光每朝見上虛已斂容禮下之已甚光秉政前後二十年地節二年春病篤車駕自臨問光病上爲

之涕泣光上書謝恩曰願分國邑三千戶以封兄孫奉車校尉山爲列侯奉兄驃騎將軍去病祀事下丞相御史卽日拜光子禹爲右將軍光薨上及皇太后親臨光

通志

卷四

列傳十三

十

喪大中大夫任宣與侍御史五人持節護喪事中二千石治莫府冢上賜金錢繪絮繡被百領衣五十篋璧珠

璣玉衣梓宮

棺也

便房黃腸題湊各一具椁木外藏椁十

五具

以柏木黃心累棺外故曰黃腸木頭皆內向故曰題湊便房小曲室也

東園温明

園

造比器形如方漆桶開一面以鑿置其中懸尸上大斂并蓋之皆如乘輿制度載光尸

柩以輜輶車

車有窗閉之則輶開之則輶

黃屋左纛發材官輕車北

軍五校士軍陳至茂陵以送其葬諡曰宣成侯發三河卒穿復土起冢祠堂置園邑三百家長丞奉守如舊法

旣葬封山爲樂平侯以奉車都尉領尚書事天子思光功德下詔曰故大司馬大將軍博陸侯宿衛孝武皇帝

三十餘年輔孝昭皇帝十有餘年遭大難躬秉誼率三公九卿定萬世策以安社稷天下蒸庶咸以康寧功德茂盛朕甚嘉之復其後世疇其爵邑世世無有所與功如蕭相國明年夏封太子外祖父許廣漢爲平恩侯復下詔曰宣成侯光宿衛忠正勤勞國家善善及後世其封光兄孫中郎將雲爲冠陽侯禹旣嗣爲博陸侯太夫人顯改光時所自造塋制而侈大之起三出闕築神道北臨昭靈南出承恩

皆館名

盛飾祠室輦閣通屬永巷而

幽良人婢妾守之廣治第室作乘輿輦加畫繡網馮黃

金塗韋絮薦輪侍婢以五綵絲輓顯游戲第中初光愛

通志

卷宿

列傳十三

十一

幸監奴馮子都常與計事及顯寡居與子都亂而禹山亦竝繕治第宅走馬馳逐平樂館雲當朝請數稱病私出多從賓客張圍獵黃山苑中使蒼頭奴上朝謁莫敢譴者而顯及諸女晝夜出入長信宮殿中無期度宣帝自在民間知霍氏尊盛日久內不能善光薨上始躬親朝政御史大夫魏相給事中顯謂禹雲山女曹不務奉大將軍餘業今大夫給事中他人壹閒女能復自救邪後兩家奴爭道霍氏奴入御史府欲踰大夫門御史爲叩頭謝乃去人以謂霍氏顯等始知憂會魏大夫爲丞相數燕見言事平恩侯與侍中金安上等徑出入省中

時霍山自若領尚書上令吏民得奏封事不關尚書羣臣進見獨往來於是霍氏甚惡之宣帝始立微時許妃爲皇后顯愛小女成君欲貴之私使乳醫淳于衍行毒藥殺許后因勸光內成君代立爲后語在后妃傳始許后暴崩吏捕諸醫劾衍侍疾亡狀不道下獄吏簿問急顯恐事敗卽具以實語光光大驚欲自發舉不忍猶與會奏上因署衍勿論光薨後語稍泄於是上始聞之而未察乃徙光女婿度遼將軍未央衛尉平陵侯范朋友爲光祿勳次婿諸吏中郎將羽林監任勝出爲安定太守數月復出光姊婿給事光祿大夫張朔爲蜀郡太守羣孫婿中郎將王漢爲武威太守頃之復使光長女婿長樂衛尉鄧廣漢爲少府更以禹爲大司馬冠小冠亡印綬罷其右將軍屯兵官屬特使禹官名與光俱大司馬者又收范朋友度遼將軍印綬但爲光祿勳及光中女婿趙平爲散騎都尉光祿大夫將屯兵又收平騎都尉印綬諸領胡越騎羽林及兩宮衛將屯兵悉易以所親信許史子弟代之禹爲大司馬稱病禹故長史任宣候問禹曰我何病縣官謂天子也非我家將軍不得至是今將軍墳墓未乾盡外我家反任許史奪我印綬令人不省死宜見禹恨望深乃謂曰大將軍時何可復生持國

通志

卷四

列傳十三

五

權柄殺生在手中廷尉李种王平左馮翊賈騰胡及車丞相女壻少府徐仁皆坐逆將軍意下獄死使樂成小家子得幸將軍至九卿封侯百官以下但事馮子都王子方等視丞相無如也各自有時今許史自天子骨肉貴正宜耳今大司馬欲用是怨恨愚以爲不可禹默然數日起視事顯及禹山雲自見日侵削數相對涕泣自怨山曰今丞相用事縣官信之盡變易大將軍時法令以公田賦與貧民發揚大將軍過失又諸儒生多寡人子遠客饑寒喜妄說狂言不避忌諱大將軍常讎之今陛下好與諸儒生語人人自使書對事多言我家者嘗

通志

卷四

列傳十三

三

有上書言大將軍時主弱臣彊專制擅權今其子孫用事昆弟益驕恣恐危宗廟災異數見盡爲是也其言絕痛山屏不奏其書後上書者益黠盡奏封事輒下中書令出取之不關尙書益不令人顯曰丞相數言我家獨亡罪乎山曰丞相廉正安得罪我家昆弟諸壻多不謹又聞民間謹言霍氏毒殺許皇后寧有是邪顯恐急卽具以實告山雲禹山雲禹驚曰如是何不早告禹等縣官離散斥逐諸壻用是故也此大事誅罰不小奈何於是始有邪謀矣初趙平客石夏善爲天官語平曰熒惑守御星御星太僕奉車都尉也不黜則死平內憂山等

雲舅李竟所善張赦見雲家卒卒謂竟曰今丞相與平
恩侯用事可令太夫人言太后先誅此兩人移徙陛下
在太后耳長安男子張章告之事下廷尉執金吾捕張
赦石夏等後有詔止勿捕山等愈恐相謂曰此縣官重
太后故不竟也然惡端已見又有試許后事陛下雖寬
仁恐左右不聽久之猶發發卽族矣不如先也遂令諸
女各歸報其夫皆曰安所相避會李竟坐與諸侯交通
辭語及霍氏有詔雲山不宜宿衛免就第光諸女遇太
后無禮馮子都數犯法上并以爲讓山禹等甚恐顯夢
第中井水溢流庭下竈居樹上又夢大將軍謂顯曰知

通志

卷宿

列傳十三

古

捕兒不亟下捕之第中鼠暴多與人相觸以尾畫地鴉
數鳴殿前樹上第門自壞

古者宮室高大則通呼雲尙
角殿非止天子宮中也

冠里宅中門亦壞巷端人共見有人居雲屋上徹瓦投
地就視亡有大怪之禹夢車騎聲正謹來捕禹舉家憂

愁山曰丞相擅滅宗廟羔菟盡可以此罪也謀欲令太

后爲博平君置酒

博平君宣帝
外祖母也

召丞相平恩侯以下使

范明友鄧廣漢承太后制引斬之因廢天子而立禹約

定未發雲拜爲玄菟太守太中大夫任宣爲代郡太守

山又坐寫祕書顯爲上書獻城西第入馬千匹以贖山

罪書報聞會事發覺雲山明友自殺顯禹廣漢等捕得

禹要斬顯及諸女昆弟皆棄市唯獨霍后廢處昭臺宮
與霍氏相連坐誅滅數千家上乃下詔曰乃者東織室
令史張赦使魏郡豪李竟報冠陽侯雲謀爲大逆朕以
大將軍故抑而不揚冀其自新今大司馬博陸侯禹與
母宣成侯夫人顯及從昆弟子冠陽侯雲樂平侯山諸
姊妹壻謀爲大逆欲誅誤百姓賴宗廟神靈先發得咸
伏其辜朕甚悼之諸爲霍氏所誅誤事在丙申前未發
覺在吏者皆赦除之男子張章先發覺以語期門董忠
忠告左曹楊惲惲告侍中金安上惲召見對狀後章上
書以聞侍中史高與安金上建發其事言無入霍氏禁
闈卒不得遂其謀皆讎有功封章爲博成侯忠高昌侯
惲平通侯安上都成侯高樂陵侯初霍氏奢侈茂陵徐
生曰霍氏必亡夫奢則不遜不遜必侮上侮上者逆道
也在人之右衆必害之霍氏秉權日久害之者多矣天
下害之而又行以逆道不亡何待乃上疏言霍氏太盛
陛下卽愛厚之宜以時抑制無使至亡書三上輒報聞
其後霍氏誅滅而告霍氏者皆封人爲徐生上書曰臣
聞客有過主人者見其竈直突傍有積薪客謂主人更
爲曲突遠徙其薪不者且有火患主人默然不應俄而
家果失火鄰里共救之幸而得息於是殺牛置酒謝其

通志

卷四

列傳十三

五

鄰人灼爛者在於上行餘各以功次坐而不錄言曲突
者人謂主人曰鄉使聽客之言不費牛酒終無火患今
論功而請賓曲突徙薪無恩澤焦頭爛額爲上客邪主
人乃寤而請之今茂陵徐福數上書言霍氏且有變宜
防絕之鄉使福說得行則國無裂土出爵之費臣無逆
亂誅滅之言往事旣已而福獨不蒙其功唯陛下察之
貴徙薪曲突之策使居焦髮灼爛之右上乃賜福帛十
匹後以爲郎宣帝始立謁見高廟大將軍光驂乘上內
嚴憚之若有芒刺在背後車騎將軍張安世代光驂乘
天子從容肆體甚安近焉及光身死而宗族竟誅故俗
傳之曰威震主者不畜霍氏之禍萌於驂乘至成帝時
爲光置守冢百家吏卒奉祠焉元始二年封光從父昆
弟曾孫陽爲博陸侯千戶

通志

卷四

列傳十三

五

金日磾字翁叔本匈奴休屠王太子也武帝元始中驃
騎將軍霍去病將兵擊匈奴右地多斬首虜獲休屠王
祭天金人其夏驃騎復西過居延攻祁連山大克獲於
是單于怨昆邪休屠音除居西方多爲漢所破召其王欲
誅之昆邪休屠恐謀降漢休屠王後悔昆邪王殺之并
將其衆降漢封昆邪王爲列侯日磾以父不降見殺與
母闕氏弟倫俱沒入官輸黃門養馬時年十四矣久之

武帝游宴見馬後宮滿側日磾等數十人牽馬過殿下莫不竊視至日磾獨不敢日磾長八尺二寸容貌甚嚴馬又肥好上異而問之具以本狀對上奇焉即日賜湯沐衣冠拜爲馬監遷侍中駙馬都尉光祿大夫日磾既親近未嘗有過失上甚信愛之賞賜累千金出則驂乘入侍左右貴戚多竊怨曰陛下妄得一胡兒反貴重之上聞愈厚焉日磾母教誨兩子甚有法度上聞而嘉之病死詔圖畫於甘泉宮署曰休屠王閼氏日磾每見畫常拜鄉之涕泣然後乃去日磾子二人上皆愛之爲帝弄兒常在旁側弄兒或自後擁上項日磾在前見而目之弄兒走且噉曰翁怒上謂日磾何怒吾兒爲其後弄兒壯大不謹自殿下與宮人戲日磾適見之惡其淫亂遂殺弄兒弄兒即日磾長子也上聞之大怒日磾頓首謝具言所以殺弄兒狀上甚哀爲之泣已而心敬日磾初莽何羅本姓馬明德后惡其先有反易曰莽與江充相善及充敗衛太子何羅弟通用誅太子時力戰得封後上知太子冤迺夷滅充宗族黨與何羅兄弟懼及遂謀爲逆日磾視其志意非常心疑之陰獨察其動靜與俱上下何羅亦覺

日磾意以故久不得發是時上幸林光宮

甘泉一日磾名林光

小疾臥廬何羅與通及小弟安成矯制夜出共殺使者

通志

卷宿

列傳十三

七

發兵明旦上未起何羅從外入日磾奏厠心動立入坐
內戶下須臾何羅褰白刃從東箱上見日磾色變走趨
臥內欲入行觸寶瑟僵日磾得抱何羅因傳曰莽何羅
反上驚起左右拔刃欲格之上恐并中日磾止勿格日
磾掉胡胡頸也掉卽律切投何羅殿下得禽縛之窮治皆伏辜

絲是著忠孝節日磾自在左右目不忤視者數十年賜
出宮女不敢近上欲內其女後宮不肯其篤慎如此上

尤奇異之及上病屬霍光以輔少主光讓日磾日磾曰
臣外國人且使匈奴輕漢於是遂爲光副光以女妻日

磾嗣子賞初武帝遺詔以討莽何羅功封日磾程丁故

通志

卷四

列傳十三

六

侯日磾以帝少不受封輔政歲餘病困大將軍光白封

日磾臥授印綬一日冕賜葬具冢地送以輕軍介士軍

陳至茂陵諡曰敬侯日磾兩子賞建俱侍中與昭帝略

同年共臥起賞爲奉車建爲駙馬都尉及賞嗣侯佩兩

綬上謂霍將軍曰金氏兄弟兩人不可使俱兩綬邪霍

光對曰賞自嗣父爲侯耳上笑曰侯不在我與將軍乎

光曰先帝之約有功乃得封侯時年俱八九歲宣帝立

賞爲大僕霍氏有事萌芽上書去妻上亦自哀之獨得

不坐元帝時爲光祿勳亡子國除元始中繼絕世封建

孫當爲程侯奉日磾後初日磾所將俱降弟倫字少卿

爲黃門郎早卒日碑兩子貴及孫則衰矣而倫後嗣遂
盛子安上始貴顯封侯安上字子侯少爲侍中惇篤有
智宣帝愛之頗與發舉楚王延壽反謀賜爵關內侯食
邑三百戶後霍氏反安上傳禁門闔無內霍氏親屬封
爲都成侯至建章衛尉薨賜冢塋杜陵諡曰敬侯四子
常敞岑明皆爲諸曹中郎將常光祿大夫元帝爲太子
時敞爲中庶子幸有寵帝卽位爲騎都尉光祿大夫中
郎將侍中元帝崩故事近臣皆隨陵爲園郎敞以世名
忠孝太后詔置侍成帝爲奉車水衡都尉至衛尉敞爲
人正直敢犯顏色左右憚之唯上亦難焉病甚上使使

通志

卷八

列傳十三

九

者問所欲以弟岑爲託上召岑拜爲使主客敞子涉本
爲左曹上拜涉爲侍中使待幸綠車載送衛尉舍須臾
卒敞三子涉參饒涉明經節儉諸儒稱之成帝時爲侍
中騎都尉領三輔胡越騎哀帝卽位爲奉車都尉至長
信少府而參使匈奴爲匈奴中郎將越騎校尉關內都
尉安定東海太守饒爲越騎校尉涉兩子湯融皆侍中
諸曹將大夫而涉之從父弟欽舉明經爲太子門大夫
哀帝卽位爲太中大夫給事中欽從父弟遷爲尚書令
兄弟用事帝祖母傅太后崩欽使護作職辦擢爲泰山
弘農太守著威名平帝卽位徵爲大司馬司直京兆尹

帝年幼選置師友大司徒孔光以明經高行爲孔氏師
京兆尹金欽以家世忠孝爲金氏友徙光祿大夫侍中
秩中二千石封都成侯時王莽新誅平帝外家衛氏召
明禮少府宗伯鳳入說爲人後之誼白令公卿將軍侍
中朝臣竝聽欲以內厲平帝而外塞百姓之議欽與族
昆弟稔侯當俱封初當曾祖父日碑傳子節侯賞而欽
祖父安上傳子夷侯常皆亡嗣國除故莽封欽當奉其
後當母南卽莽母功顯君同產弟也當上南大行爲太
夫人大行欽因緣謂當詔書陳日碑功亡有賞語當名
爲以孫繼祖也自當爲父祖父立廟賞故國君使大夫

通志

卷四

列傳十二

五

主其祭時甄邯在旁庭叱欽因劾奏曰欽幸得以通經
術超擢侍帷幄重蒙厚恩封襲爵號知聖朝以世有爲
人後之誼前遭故定陶太后背本逆天孝哀不獲厥福
乃者呂寬衛寶復造姦謀至於反逆咸伏厥辜太皇太
后懲艾悼懼逆天之咎非聖誣法大亂之殃誠欲奉承
天心遵明聖制專壹爲後之誼以安天下之命數臨正
殿延見羣臣講習禮經孫繼祖者謂亡正統持重者也
賞見嗣日碑後成爲君持大宗重則禮所謂尊祖故敬
宗大宗不可以絕者也欽自知與當俱拜同誼卽數揚
言殿省中教當云云當卽如其言則欽亦欲爲父明立

廟而不入夷侯常廟矣進退異言頗惑衆心亂國大綱
開禍亂原誣祖不孝罪莫大焉尤非大臣所宜大不敬
稔侯當上母南爲太夫人亦失禮不敬莽白太后下四
輔公卿大夫博士議郎皆曰欽宜以時卽罪謁者召欽
詣詔獄欽自殺郡以綱紀國體無所阿私忠孝尤著益
封千戶更封長信少府涉子右曹湯爲都成侯湯受封
日不敢還家以明爲人後之誼益封之後莽復用欽弟
遵封侯歷九卿位日磧本夷狄亡國羈虜漢庭而以篤
敬寤主忠信自著勒功上將傳國後嗣世名忠孝七世
內侍何其盛也本以休屠作金人爲祭天主故因賜姓

通志

卷宿

列傳十三

三

金氏云

趙充國字翁孫隴西上邽人也後徙金城令居

令音零始

爲騎士以六郡良家子

金城隴西北地安定北地上郡

善騎射補羽林

爲人沈勇有大略少好將帥之節而學兵法通知四夷
事武帝時以假司馬從貳師將軍擊匈奴大爲虜所圍

漢軍乏食數日死傷者多充國乃與壯士百餘人潰圍

陷陳貳師引軍隨之遂得解身被二十餘創貳師奏狀

詔徵充國詣行在所武帝親見視其創嗟歎之拜爲中

郎遷車騎將軍長史昭帝時武都氐人反充國以大將

軍護軍都尉將兵擊定之遷中郎將將屯上谷還爲水

衡都尉擊匈奴獲西祁王擢爲後將軍兼水衡如故與
大將軍霍光定策尊立宣帝封營平侯本始中爲蒲類
將軍征匈奴斬虜數百級還爲後將軍少府匈奴大發
十餘萬騎南旁塞至符奚盧山欲入爲寇亡者題餘渠
堂降漢言之遣充國將四萬騎屯緣邊九郡單于聞之
引去是時光祿大夫義渠安國使行諸羌先零音憐豪言
願得度湟水北逐民所不田處畜牧安國以聞充國劾
安國奉使不敬是後羌人旁緣前言抵冒度湟水郡縣
不能禁元康三年先零遂與諸羌種豪二百餘人解仇
交質盟詛上聞之以問充國對曰羌人所以易制者以
通志

卷四

列傳十三

三

其種自有豪數相攻擊執不壹也往三十餘歲西羌反
時亦先解仇合約攻令居與漢相距五六年乃定至政
和五年先零豪封煎等通使匈奴匈奴使人至小月氏
傳告諸羌曰漢貳師將軍衆十餘萬人降匈奴羌人爲
漢事苦張掖酒泉本我地地肥美可共擊居之以此觀
匈奴欲與羌合非一世也聞者匈奴困於西方聞烏桓
來保塞恐兵復從東方起數使使尉黎危須諸國設以
子女貂裘欲沮解之其計不合疑匈奴更遣使至羌中
道從沙陰地出鹽澤過長阬入窮水塞南抵屬國與先
零相直臣恐羌變未止此且復結聯他種宜及未然爲

之備後月餘羌侯狼何果遣使者至匈奴藉兵欲擊鄯善敦煌以絕漢道充國以爲狼何小月氏種在陽關西南執不能獨造此計疑匈奴使已至羌中先零罕开賢反乃解仇作約到秋馬肥變必起矣宜遣使者行邊兵

豫爲備敕視諸羌毋令解仇以發覺其謀於是兩府復白遣義渠安國行視諸羌分別善惡安國至召先零諸豪三十餘人以尤桀黠者皆斬之縱兵擊其種人斬首千餘級於是諸降羌及歸義羌侯楊玉等恐怒亡所信鄉遂劫略小種背畔犯塞攻城邑殺長吏安國以騎都尉將騎三千屯備羌至浩亶爲虜所擊失亡車重兵器甚衆安國引還至令居以聞是歲神爵元年春也時充國年七十餘上老之使御史大夫丙吉問誰可將者充國對曰無逾於老臣者矣上遣問曰將軍度羌虜何如當用幾人充國曰百聞不如一見兵難險遙度臣願馳至金城圖上方略然羌戎小夷逆天背畔滅亡不久願陛下以屬老臣勿以爲憂上笑曰諾充國至金城須兵滿萬騎欲渡河恐爲虜所遮卽夜遣三校銜枚先渡渡輒營陳會明畢遂以次盡渡虜數千百騎來出入軍傍充國曰吾士馬新倦不可馳逐此皆驍騎難制又恐其爲誘兵也擊虜以殄滅爲期小利不足貪令軍勿擊遣

通志

卷宿

列傳十三

五

騎候四望狹中亡虜夜引兵上至落都召諸校司馬謂
曰吾知羌虜不能爲兵矣使虜發數十人守杜四望狹
中兵豈得入哉充國常以遠斥候爲務行必爲戰備止
必堅營壁尤能持重愛士卒先計而後戰遂西至西部
都尉府日享軍士士皆欲爲用虜數挑戰充國堅守捕
得生口言羌豪數相責曰語汝亡反今天子遣趙將軍
來年八九十矣善爲兵今請欲壹鬪而死可得邪充國
子右曹中郎將卬將期門飲飛羽林孤兒胡越騎爲支
兵至令居虜竝出絕轉道卬以聞有詔將入校尉與驍
騎都尉金城太守合疏補山閒虜通轉道津度初罕升

通志

卷四

列傳十三

五

豪靡當兒使弟雕庫來告都尉曰先零欲反後數日果
反雕庫種人頗在先零中都尉卽留雕庫爲質充國以
爲亡罪乃遣歸告種豪大兵誅有罪者明白自題母取
并滅天子告諸羌人犯法者能相捕斬除罪斬大豪有
罪者一人賜錢四十萬中豪十五萬下豪二萬大男三
千女子及老小千錢又以其所捕妻子財物盡與之充
國計欲以威信招降罕升及劫略者解散虜謀微極乃
擊之時上已發三輔太常徒弛刑三河潁川沛郡淮陽
汝南材官金城隴西天水安定北地上郡騎士羌騎與
武威張掖酒泉太守各屯其郡者合六萬人矣酒泉太

守辛武賢奏言郡兵皆屯備南山北邊空虛執不可久
或曰至秋冬乃進兵此虜在意外之冊今虜朝夕爲寇
土地寒苦漢馬不能冬屯兵在武威張掖酒泉萬騎以
上皆多羸瘦可益馬食以七月上旬齎三十日糧分兵
竝出張掖酒泉合擊罕开在鮮水上者虜以畜產爲命
今皆離散兵卽分出雖不能盡誅置奪其畜產虜其妻
子復引兵還冬復擊之大兵仍出虜必震壞天子下其
書充國令與校尉以下吏士知羌事者博議充國及長
史董通年以爲武賢欲輕引萬騎分爲兩道出張掖回
遠千里以一馬自佗負三十日食爲米二斛四斗麥八
斛又有衣裝兵器難以追逐勤勞而至虜必商軍進退
稍引去逐水少入山林隨而深入虜卽據前險守後隄
以絕糧道必有傷危之憂爲夷狄笑千載不可復而武
賢以爲可奪其畜產虜其妻子此殆空言非至計也又
武威縣張掖日勒皆當北塞有通谷水草臣恐匈奴與
羌有謀且欲大人幸能要杜張掖酒泉以絕西域其郡
兵尤不可發先零首爲畔逆它種劫略故臣愚冊欲捐
罕开闇昧之過隱而勿章先行先零之誅以震動之宜
悔過反善因赦其罪選擇良吏知其俗者拊循和輯此
全師保勝安邊之冊天子下其書公卿議者咸以爲先

通志

卷四

列傳十三

五

零兵盛而負罕并之助不先破罕并則先零未可圖也
上乃拜侍中樂成侯許延壽爲疆弩將軍卽拜酒泉太
守武賢爲破羌將軍賜璽書嘉納其冊以書敕讓充國
曰皇帝問後將軍甚苦暴露將軍計欲至正月乃擊罕
并羌羌人當獲麥已遠其妻子精兵萬人欲爲酒泉燉
煌寇邊兵少民守保不得田作今張掖以東粟石百餘
芻橐束數十轉輸竝起百姓煩擾將軍將萬餘之衆不
早及秋共水草之利爭其畜食欲至冬虜皆當畜食多
臧匿山中依險阻將軍士寒手足皸瘃皸圻裂也音軍瘃寒創也音竹
足寧有利哉將軍不念中國之費欲以歲數而勝微將

通志

卷宿

列傳十三

五

軍誰不樂此者今詔破羌將軍武賢將兵六千一百人
燉煌太守快將二千人長水校尉富昌酒泉侯奉世將
娒月氏兵四千人娒兒亡慮萬二千人齋三十日食以
七月二十二日擊罕羌入鮮水北句廉上去酒泉八百
里去將軍可千二百里將軍其引兵便道西竝進雖不
相及使虜聞東方北方兵竝來分散其心意離其黨與
雖不能殄滅當有瓦解者已詔中郎將卬將胡越飲飛
射士步兵二校尉益將軍兵今五星出東方中國大利
蠻夷大敗太白出高用兵深入敢戰者吉不敢戰者凶
將軍急裝因天時誅不義萬下必全勿復有疑充國旣

得讓以爲將任兵在外便宜有守以安國家乃上書謝
罪因陳兵利害曰臣竊見騎都尉安國前幸賜書釋羌
人可使使罕論告以大軍當至漢不誅罕以解其謀恩
澤甚厚非臣下所能及臣獨私美陛下盛德至計亡已
故遣并豪彫庫宣天子至德罕并之屬皆聞知明詔今
先零羌楊玉此羌之首帥名王將騎四千及煎鞏騎五
千阻石山木候便爲寇罕羌未有所犯今置先零先擊
罕釋有罪誅亡辜起壹難就兩害誠非陛下本計也臣
聞兵法攻不足者守有餘又曰善戰者致人不致於人
而今罕羌欲爲燉煌酒泉寇宜飭兵馬練戰士以須其
至坐得致敵之術以逸擊勞取勝之道也今恐二郡兵
少不足以守而發之行攻釋致虜之術而從爲虜所致
之道臣愚以爲不便先零羌虜欲爲背畔故與罕并解
仇結約然其私心不能忘恐漢兵至而罕并背之也臣
愚以爲其計常欲先赴罕并之急以堅其約先擊罕羌
先零必助之今虜馬肥糧食方饒擊之恐不能傷害適
使先零得施德於罕羌堅其約合其黨虜交堅黨合精
兵二萬人迫脅諸小種附著者稍衆莫須之屬不輕得
離也如是虜兵浸多誅之用力數陪臣恐國家憂累絲
十年數不二三歲而已臣得蒙天子厚恩父子俱爲顯

通志

卷四

列傳十三

五

列臣位至上卿爵爲列侯犬馬之齒七十六爲明詔填溝壑死骨不朽亡所顧念獨思惟兵利害至熟悉也於臣之計先誅先零已則罕并之屬不煩兵而服矣先零已誅而罕并不服涉正月擊之得利之理又其時也以今進兵誠不見其利唯陛下裁察六月戊申奏七月甲寅璽書報從充國計焉充國引兵至先零在所虜久屯聚解弛望見大軍棄車重欲度湟水道阨狹充國徐行驅之或曰逐利行遲充國曰此窮寇不可迫也緩之則走不顧急之則還致死諸校皆曰善虜赴水溺死者數百降及斬首五百餘人鹵馬牛羊十萬餘頭車四千餘

通志

卷宿

列傳十三

元

兩兵至罕地令軍毋燔聚落芻牧田中罕羌聞之喜曰漢果不擊我矣豪靡忘使人來言願得復還故地充國以聞未報靡忘來自歸充國賜飲食遣還諭種人護軍以下皆爭之曰此反虜不可擅遣充國曰諸君但欲便文自營非爲公家忠計也語未卒璽書報令靡忘以贖論後罕竟不煩兵而下其秋充國病上賜書曰制詔後將軍聞苦腳脛寒泄將軍年老加疾一朝之變不可諱朕甚憂之今詔破羌將軍詣屯所爲將軍副急因天時大利吏士銳氣以十二月擊先零羌卽疾劇留屯毋行獨遣破羌彊弩將軍時羌降者萬餘人矣充國度其必

壞欲罷騎兵屯田以待其敵作奏未上會得進兵璽書
中郎將卬懼使客諫充國曰誠令兵出破軍殺將以傾
國家將軍守之可也卽利與病又何足爭一旦不合上
意遣繡衣來責將軍將軍之身不能自保何國家之安
充國歎曰是何言之不忠也本用吾言羌虜得至是邪
往者舉可先行羌者吾舉辛武賢丞相御史復白遣義
渠安國竟沮敗羌金城皇中穀斛八錢吾謂耿中丞糴
三百萬斛穀羌人不敢動矣耿中丞請糴百萬斛乃得
四十萬斛耳義渠再使且質其半失此二冊羌人故敢
爲逆失之毫釐差以千里是旣然矣今兵久未決四夷
卒有動搖相因而起雖有知者不能善其後羌獨足憂
邪吾固以死守之明主可爲忠言遂上屯田奏曰臣聞
兵者所以明德除害也故舉得於外則福生於內不可
不慎臣所將吏士馬牛食月用糧穀十九萬九千六百
三十斛鹽千六百九十三斛芟橐二十五萬二百八十
六石難久不解繇役不息又恐他夷卒有不虞之變相
因竝起爲明主憂誠非素定廟勝之冊且羌虜易以計
破難用兵碎故也臣以爲擊之不便計度臨羌東至浩
亶羌虜故田及公田民有所未墾可二千頃以上其閒
郵亭多壞敗者臣前部士入山伐材木大小六萬餘枚

皆在水次願罷騎兵畱弛刑應募及淮陽汝南步兵與
吏士私從者合凡萬二百八十一人用穀月二萬七千
三百六十三斛鹽三百八斛分屯要害處水解漕下繕
鄉亭浚溝渠治湟狹以西道橋七十所令可至鮮水左
右田事出賦人二十畝至四月草生發郡騎及屬國胡
騎伉健各千倅馬什二就草爲田者游兵以充入金城
郡益積畜省大費今大司農所轉穀至者足支萬人一
歲食謹上田處及器用簿唯陛下裁許上報曰皇帝問
後將軍言欲罷騎兵萬人畱田卽如將軍之計虜當何
時伏誅兵當何時得決熟計其便復奏充國上狀曰臣

通志

卷四

列傳十三

三

聞帝王之兵以全取勝是以貴謀而賤戰戰而百勝非
善之善者也故先爲不可勝以待敵之可勝蠻夷習俗
雖殊於禮義之國然其欲避害就利愛親戚畏死亡一
也今虜亡其美地薦草愁於寄託遠遯骨肉心離人有
畔志而明主班師罷兵萬人畱田順天時因地利以待
可勝之虜雖未卽伏辜兵決可期月而望羌虜瓦解前
後降者萬七百餘人及受言去者凡七十輩此坐支解
羌虜之具也臣謹條不出兵畱田便宜十二事步兵九
校吏士萬人畱屯以爲武備因田致穀威德並行一也
又因排折羌虜令不得歸肥饒之地貧破其衆以成羌

虜相畔之漸二也居民得竝田作不失農業三也軍馬一月之食度支田士一歲罷騎兵以省大費四也至春省甲士卒循河湟漕穀至臨羌以視羌虜揚威武傳世折衝之具五也以閒暇時下所伐材繕治郵亭充入金城六也兵出乘危徼倖不出令反畔之虜竄於風寒之地離霜露疾疫瘥墮之患坐得必勝之道七也亡經阻遠追死傷之害八也內不損威武之重外不令虜得乘閒之執九也又亡驚動河南大并小并使生宅變之憂十也治湟狹中道橋令可至鮮水以制西域信威千里從枕席上過師十一也大費既省繇役豫息以戒不虞

通志

卷宿

列傳十三

三

十二也雷屯田得十二便出兵失十二利臣充國材下犬馬齒衰不識長策唯明詔博詳公卿議臣采擇上復賜報曰皇帝問後將軍言十二便聞之虜雖未伏誅兵決可期月而望期月而望者謂今冬邪謂何時也將軍獨不計虜聞兵頗罷且丁壯相聚攻擾田者及道上屯兵復殺略人民將何以止之又大并小并前言曰我告漢軍先零所在兵不往擊久雷得亡效五年時不分別人而并擊我其意常恐今兵不出得亡變生與先零爲一將軍孰計復奏充國奏曰臣聞兵以計爲本故多算勝少算先零羌精兵今餘不過七八千人失地遠客分

散饑凍旱升莫須又頗暴略其羸弱畜產畔還者不絕
皆聞天子明令相捕斬之賞臣愚以爲虜破壞可日月
冀遠在來春故曰兵決可期月而望竊見北邊自燉煌
至遼東萬一千五百餘里乘塞列隊有吏卒數千人虜
數大衆攻之而不能害今畱步士萬人屯田地執平易
多高山遠望之便部曲相保爲塹壘木樵校聯不絕便
兵弩飭鬪具爇火幸通執及并力以逸待勞兵之利者
也臣愚以爲屯田內有亡費之利外有守禦之備騎兵
雖罷虜見萬人畱田爲必禽之具其土崩歸德宜不久
矣從今盡三月虜馬羸瘦必不敢捐其妻子於它種中

通志

卷四

列傳十三

三

遠涉河山而來爲寇又見屯田之士精兵萬人終不敢
復將其累重還歸故地是臣之愚計所以度虜且必瓦
解其虛不戰自破之冊也至於虜小寇盜時殺人民其
原未可卒禁臣聞戰不必勝不苟接刃攻不必取不苟
勞衆誠令出兵雖不能滅先零豈能令虜絕不爲小寇
則出兵可也卽今同是而釋坐勝之道從乘危之執往
終不見利空內自罷敵貶重而自損非所以視蠻夷也
又大兵一出還不可復畱湟中亦未可空如是絲役復
發也且匈奴不可不備烏桓不可不憂今久轉運煩費
傾我不虞之用以澹一隅臣愚以爲不便校尉臨衆幸

得承威德奉厚幣拊循衆羌諭以明詔宜皆鄉風雖其
前辭嘗曰得亡效五年宜亡他心不足以故出兵臣竊
自惟念奉詔出塞引軍遠擊窮天子之精兵散車甲於
山野雖亡尺寸之功媮得避嫌之便而亡後咎餘責此
人臣不忠之利非明主社稷之福也臣幸得奮精兵討
不義久留天誅罪當萬死陛下寬仁未忍加誅令臣數
得執計愚臣伏計孰甚不敢避斧鉞之誅昧死陳愚唯
陛下省察充國奏每上輒下公卿議臣初是充國者什
三中什五最後什八有詔詰前言不便者皆頓首服丞
相魏相曰臣愚不習兵事利害後將軍數畫軍冊其言
常是臣任其計可必用也上於是報充國曰皇帝問後
將軍上書言羌虜可勝之道今聽將軍將軍計善其上
雷屯田及當罷者人馬數將軍彊食慎兵事自愛上以
破羌彊弩將軍數言當擊又用充國屯田處離散恐虜
犯之於是兩從其計詔兩將軍與中郎將卬出擊彊弩
出降四千餘人破羌斬首二千級中郎將卬斬首降者
亦二千餘級而充國所降復得五千餘人詔罷兵獨充
國雷屯田明年五月充國奏言羌可五萬人軍凡斬首
七千六百級降者三萬一千二百人溺河湟饑餓死者
五六千人定計遺脫與煎鞏黃羝俱亡者不過四千人

通志

卷四

列傳十三

三

羌靡忘等自詭必得請罷屯兵奏可充國振旅而還所善浩星賜迎說充國曰衆人皆以破羌彊弩出擊多斬首獲降虜以破壞然有識者以爲虜執困窮兵雖不出必自服矣將軍卽見宜歸功於二將軍出擊非愚臣所及如此將軍計未失也充國曰吾年老矣爵位已極豈嫌伐一時事以欺明主哉兵執國之大事當爲後法老臣不以餘命一爲陛下明言兵之利害卒死誰當復言之者卒以其意對上然其計罷遣辛武賢歸酒泉太守官充國復爲後將軍衛尉其秋羌若零離雷且種兒庫共斬先零大豪猶非楊玉首及諸豪弟澤陽雕良兒靡

通志

卷四

列傳十三

五

忘皆帥煎鞏黃羝之屬四千餘人降漢封若零弟澤二人爲帥衆王離雷且種二人爲侯兒庫爲君陽彫爲言兵侯良兒爲君靡忘爲獻牛君初置金城屬國以處降羌詔舉可護羌校尉者時充國病四府舉辛武賢小弟湯充國遽起奏湯使酒不可典蠻夷不如湯兄臨衆時湯已拜受節有詔更用臨衆後臨衆病免五府復舉湯湯數醉醜羌人羌人反畔卒如充國之言初破羌將軍武賢在軍中時嘗與中郎將卬宴語卬道車騎將軍張安世始嘗不快上上欲誅之卬家將軍以爲安世本持橐籥筆近臣負橐籥筆從備顧問事孝武帝數十年見謂

問或有所記橐囊也

事孝武帝數十年見謂

忠謹宜全度之安世用是得免及充國還言兵事武賢
罷歸故官深恨上書告卬泄省中語卬坐禁止而入至
充國莫府司馬中亂屯兵下吏自殺充國乞骸骨賜安
車駟馬黃金六十斤罷就第朝廷每有四夷大議常與
參兵謀間籌策焉年八十六甘露二年薨諡曰壯侯傳
子至孫欽欽尙敬武公主主亡子主教欽良人習詐有
身名它人子欽薨子岑嗣侯習爲大夫人岑父母求錢
財無已忿恨相告岑坐非子免國除元始中修功臣後
復封充國會孫伋爲營平侯初充國以功德與霍光等
列畫未央宮成帝時西羌常有警上思將帥之臣追美
充國乃召黃門郎揚雄卽充國圖畫而頌之曰明靈惟
宣戎有先零先零猖狂侵漢西疆漢命虎臣惟後將軍
整我六師是討是震旣臨其域諭以威德有守矜功謂
之弗克請奮其旅于罽之羌天子命我從之鮮陽營平
守節婁秦封章料敵制勝威謀靡亢遂克西戎還師於
京鬼方賓服罔有不庭昔周之宣有方有虎詩人歌功
乃列于稚在漢中興充國作武赴赴桓桓亦紹厥後充
國爲後將軍徙杜陵辛武賢自羌軍還後七年復爲破
羌將軍征烏孫至燉煌後不出徵未到病卒子慶忌至

大官

通志

卷宿

列傳十三

五

辛慶忌字子真少以父任爲右校丞隨長羅侯常惠屯田烏孫赤谷城與翎侯戰陷陳郤敵惠奏其功拜爲侍郎遷校尉將吏士屯焉者國還爲謁者尙未知名元帝初補金城長史舉茂材遷郎中車騎將軍朝廷多重之者轉爲校尉遷張掖太守徙酒泉所在著名成帝初徵爲光祿大夫遷左曹中郎將至執金吾始武賢與趙充國有隙後充國家殺辛氏至慶忌爲執金吾坐子殺趙氏左遷酒泉太守歲餘大將軍王鳳薦慶忌前在兩郡著功迹徵入歷位朝廷莫不信鄉質行正直仁勇得衆心通於兵事明略威重任國柱石父破羌將軍武賢顯名前世有威西夷臣鳳不宜久處慶忌之右乃復徵爲光祿大夫執金吾數年坐小法左遷雲中太守復徵爲光祿勳時數有災異丞相司直何武上封事曰虞有宮之奇晉獻不寐衛青在位淮南寢謀故賢人立朝折衝馱難勝於亡形司馬法曰天下雖安忘戰必危夫將不豫設則亡以應卒士不素厲則難使死敵是以先帝建列將之官近戚主內異姓距外故姦軌不得萌動而破滅誠萬世之長冊也光祿勳慶忌行義修正柔毅敦厚謀慮深遠前在邊郡數破敵獲虜外夷莫不聞乃者大異竝見未有其應加以兵革久寢春秋大災未至而豫

通志

卷宿

列傳十三

三

禦之慶忌宜在爪牙官以備不虞其後拜爲右將軍諸
吏散騎給事中歲餘徙爲左將軍慶忌居處恭儉食飲
被服尤節約然性好輿馬號爲鮮明唯是爲奢爲國虎
臣遭世承平匈奴西域親附敬其威信年老卒官長子
通爲護羌校尉中子遵函谷關都尉少子茂水衡都尉
出爲郡守皆有將帥之風宗族支屬至三千石者十餘
人元始中安漢公王莽秉政見慶忌本大將軍王鳳所
成三子皆能欲親厚之是時莽方立威柄用甄豐甄邯
以自助豐邯新貴咸震朝廷水衡都尉茂自見其名臣
子孫兄弟竝列不甚誦事兩甄時平帝幼外家衛氏不
得在京師而護羌校尉通長子次兄素與帝從舅衛子
伯相善兩人俱游俠賓客甚盛及呂寬事起莽誅衛氏
兩甄搆言諸辛陰與衛子伯爲腹心有背恩不說安漢
公之謀於是司直陳崇舉奏其宗親隴西辛興等侵陵
百姓威行州郡莽遂按通父子遵茂兄弟及南郡太守
辛伯等皆誅殺之辛氏繇是廢慶忌本狄道人爲將軍
徙昌陵昌陵罷畱長安班固曰秦漢以來山東出相山
西出將秦將軍白起郿人王翦頻陽人漢興郁郅王圍
甘延壽義渠公孫賀傳介子成紀李廣李蔡杜陵蘇建
蘇武上邽上官桀趙充國襄武廉褒狄道辛武賢慶忌

通志

卷宿

列傳十三

七

皆以勇武顯聞蘇辛父子著節此其可稱列者也其餘不可勝數何則山西天水隴西安定北地處執迫近羌胡民俗修習戰備高上勇力鞏馬騎射故秦詩曰王于興師修我甲兵與子皆行其風聲氣俗自古而然今之歌謠慷慨風流猶存耳

傅介子北地人也以從軍爲官先是龜茲樓蘭皆嘗殺漢使者語在西域傳至元鳳中介子以駿馬監求使大宛因詔令責樓蘭龜茲國介子至樓蘭責其王敎匈奴遮殺漢使大兵方至王苟不敎匈奴使過至諸國何爲不言王謝服言匈奴使屬過當至烏孫道過龜茲

通志

卷宿

列傳十三

完

復責其王王亦服罪介子從大宛還到龜茲龜茲言匈奴使自烏孫還在此介子因率其吏士共誅斬匈奴使者還奏事詔拜介子爲中郎遷平樂監介子謂大將軍霍光曰樓蘭龜茲數反覆而不誅無所徵艾介子過龜茲時其王近就人易得也願往刺之以威示諸國光曰龜茲道遠且驗之於樓蘭於是白遣之介子與士卒俱齎金幣揚言以賜外國爲名至樓蘭王意不親介子介子陽引去至其西界使譯謂曰漢使者持黃金錦繡行賜諸國王不來受我去之西國矣卽出金幣以示譯譯還報王王貪漢物來見使者介子與坐飲陳物示之飲

酒皆醉介子謂王曰天子使我私報王王起隨介子入帳中屏語壯士二人從後刺之刃交胸立死其貴人左右皆散走介子告諭以王負罪天子遣我來誅王當更立前太子質在漢者漢兵方至毋敢動動滅國矣遂持王首還詣闕公卿將軍議者咸嘉其功詔封介子爲義陽侯食邑七百戶士刺王者皆補侍郎介子薨子敞有罪不得嗣國除元始中繼功臣絕世封介子曾孫長爲義陽侯王莽敗乃絕

常惠太原人也少時家貧自奮應募隨移中監蘇武使匈奴并見拘留十餘年昭帝時乃還漢嘉其勤勞拜爲

通志

卷四

列傳十三

五

光祿大夫是時烏孫公主上書言匈奴發騎田車師車師與匈奴爲一共侵烏孫唯天子救之漢養士馬議欲擊匈奴會昭帝崩宣帝即位本始二年遣惠使烏孫公主及昆彌皆遣使因惠言匈奴連發大兵擊烏孫取車延惡師地收其人民去使使脅求公主欲隔絕漢昆彌願發國半精兵自給人馬五萬騎盡力擊匈奴唯天子出兵以救公主昆彌於是漢大發十五萬騎五將軍分道出語在匈奴傳以惠爲校尉持節護烏孫兵昆彌自將翎侯以下五萬餘騎從西方入至右谷蠡庭

谷蠡音鹿黎

獲單于父行及嫂居次名王騎將以下三萬九千人得

馬牛驢羸橐駝五萬餘匹羊六十餘萬頭烏孫皆自取
鹵獲惠從吏卒十餘人隨昆彌還未至烏孫烏孫人盜
惠印綬節惠還自以當誅時漢五將皆無功天子以惠
奉使克獲遂封惠爲長羅侯復遣惠持金幣還賜烏孫
貴人有功者惠因奏請龜茲國嘗殺校尉賴丹未伏誅
請便道擊之宣帝不許大將軍霍光風惠以便宜從事
惠與吏士五百人俱至烏孫還過發西國兵二萬人令
副使發龜茲東國一萬人烏孫兵七千人從三面攻龜
茲兵未合先遣人責其王以前殺漢使狀王謝曰乃我
先王時爲貴人姑翼所誤耳我無罪惠曰卽如此縛姑
翼來吾置王王執姑翼詣惠惠斬之而還後代蘇武爲
典屬國明習外國事勤勞數有功甘露中後將軍趙充
國薨天子遂以惠爲右將軍典屬國如故元帝三年薨
諡曰壯武侯傳國至曾孫建武中乃絕

鄭吉會稽人也以卒伍從軍數出西域由是爲郎吉爲
人彊執習外國事自張騫通西域李廣利征伐之後初
置校尉屯田渠黎至宣帝時吉以侍郎田渠黎積穀因
發諸國兵攻破車師遷衛司馬使獲鄯善以西南道神
爵中匈奴乖亂日逐王先賢禪欲降漢使人與吉相聞
吉發渠黎龜茲諸國五萬人迎日逐王口萬二千人小

通志

卷四

列傳十三

罕

王將十二人隨吉至河曲頗有亡者吉追斬之遂將詣京師漢封日逐王爲歸德侯吉旣破車師降日逐威震西域遂并護車師以西北道故號都護都護之置自吉始焉上嘉其功封吉爲安遠侯食邑千戶吉於是中西域而立莫府治烏壘域鎮撫諸國誅伐懷集之漢之號令班西域矣始自張騫而成於鄭吉語在西域傳吉薨諡曰繆侯子光嗣薨無子國除元始中錄功臣不以罪絕者封吉曾孫永爲安遠侯

甘延壽字君況北地郁郅人也少以良家子善騎射爲羽林投石拔距絕於等倫嘗超逾羽林亭樓由是遷爲郎試弁爲期門以材力愛幸稍遷至遼東太守免官車騎將軍許嘉薦延壽爲郎中諫大夫使西域都護騎都尉與副校尉陳湯共誅斬郅支單于封義成侯薨諡曰壯侯傳國至曾孫王莽敗乃絕

陳湯字子公山陽瑕丘人也少好書博達善屬文家貧匄賁無節不爲州里所稱西至長安求官得太官獻食丞數歲富平侯張勃與湯交高其能初元二年元帝詔列侯舉茂材勃舉湯湯待遷父死不犇喪司隸奏湯無脩行勃選舉故不以實坐削戶二百會薨因賜諡曰繆侯湯下獄論後復以薦爲郎數求使外國久之遷西域

通志

卷四

列傳十三

聖

副校尉與甘延壽俱出先是宣帝時匈奴乖亂五單于爭立呼韓邪單于與郅支單于俱遣子入侍漢兩受之後呼韓邪身入稱臣朝見郅支以爲呼韓邪破弱降漢不能自還卽西收右地會漢發兵送呼韓邪單于郅支由是遂西破呼偁堅昆丁令兼三國而都之怨漢擁護呼韓邪而不助已困辱漢使者江迺始等初元四年遣使奉獻因求侍子願爲內附漢議遣衛司馬谷吉送之御史大夫貢禹博士匡衡以爲春秋之義許夷狄者不壹而足今郅支單于鄉化未淳所在絕遠宜令使者送其子至塞而還吉上書言中國與夷狄有羈縻不絕之

通志

卷宿

列傳十三

望

義今旣養全其子十年德澤甚厚空絕而不送近從塞還示棄捐不畜使無鄉從之心棄前恩立後怨不便議者見前江迺始無應敵之數知勇俱困以致恥辱卽豫爲臣憂臣幸得建疆漢之節承明聖之詔宣諭厚恩不宜敢桀若懷禽獸心加無道於臣則單于長嬰大罪必逖逃遠舍不敢近邊沒一使以安百姓國之計臣之願也願送至庭上以示朝者禹復爭以爲吉往必爲國取侮生事不可許右將軍馮奉世以爲可遣上許焉旣至郅支單于怒竟殺吉等郅支自知負漢又聞呼韓邪益彊遂西奔康居康居以女妻郅支郅支亦以女予康居

王康居甚尊敬郅支欲倚其威以脅諸國郅支數借兵擊烏孫深入至赤谷城殺略人民驅畜產烏孫不敢追西邊空虛不居者且千里郅支單于自以大國威名尊重又乘勝驕不爲康居王禮怒殺康居王女及貴人人民數百或支解投都賴水中發民作城日作五百人二歲乃已又遣使責闔蘇大宛諸國歲遺不敢不予漢遣使三輩至康居求谷吉等死郅支困辱使者不肯奉詔而因都護上書言居困竟願歸計疆漢遣子入侍其驕嫚如此建昭二年湯與延壽出西域湯爲人沈勇有大慮多策謀喜奇功每過城邑山川常登望旣領外國與延壽謀曰夷狄畏服大種其天性也西城本屬匈奴今郅支單于威名遠聞侵陵烏孫大宛常爲康居畫計欲降服之如得此二國北擊伊列西取安息南排月氏山離烏弋數年之間城郭諸國危矣且其人剽悍好戰伐數取勝久畜之必爲西域患郅支單于雖在絕遠蠻夷無金城疆弩之守如發屯田吏士驅從烏孫衆兵直指其城下彼亡則無所之守則不足自保千載之功可一朝而成也延壽亦以爲然欲奏請之湯曰國家與公卿議大策非凡所見事必不從延壽猶與不聽會其久病湯獨矯制發城郭諸國兵車師戍已校尉屯田吏士延

通志

卷宿

列傳十三

三

壽聞之驚起止焉湯按劍叱延壽曰大衆已集豎子欲沮衆邪延壽遂從之乃部勒行陳益置揚威威虎合騎之校漢兵胡兵合四萬餘人延壽湯上疏自劾奏矯制陳言兵狀卽日引軍分行別爲六校其三校從南道逾葱嶺徑大宛其三校都護自將發溫宿國北道入赤谷過烏孫涉康居界至闐池西而康居副王抱闐將數千騎寇赤谷城東殺略大昆彌千餘人驅畜產甚多從後與漢軍相及頗寇盜後重湯縱胡兵擊之殺四百六十人得其所略民四百七十人還付大昆彌其馬牛羊以給軍食又捕得抱闐貴人伊奴毒入康居東界令軍不

通志

卷拾

列傳十三

四

得爲寇間呼其貴人屠墨見之諭以威信與飲盟遣去徑引行未至單于城可六十里止營復捕得康居貴人

貝色子男開牟以爲導貝色子卽屠墨母之弟

母之弟卽謂舅

者皆怨單于由是具知郅支情明日引行未至城三十

里止營單于遣使問漢兵何以來應曰單于上書言居困厄願歸計彊漢身入朝見天子哀閔單于棄大國屈意康居故使都護將軍來迎單于妻子恐左右驚動故未敢至城下使數往來相答報延壽湯因讓之我爲單于遠來而至今無名王貴人見將軍受事者何單于忽大計失主客之禮也兵來道遠人畜罷極食度且盡恐

無以自還願單于與大臣審計策明日前至郅支城都
賴水上離城三里止營傳陳望見單于城上立五采幡
織數百人被甲乘城又出百餘騎往來馳城下步兵百
餘人夾門魚鱗陳講習用兵城上人更招漢軍曰鬪來
百餘騎馳赴營營皆張弩持滿指之騎引却頗遣吏士
射城門騎步兵騎步兵皆入延壽湯令軍聞鼓音皆薄
城下四面圍城各有所守穿塹塞門戶鹵楯爲前戟弩
爲後卽射城中樓上人樓上人下走土城外有重木城
從木城中射頗殺傷外人外人發薪燒木城夜數百騎
欲出外迎射殺之初單于聞漢兵至欲去疑康居怨已
爲漢內應又聞烏孫諸國兵皆發自以無所之郅支已
出復還曰不如堅守漢兵遠來不能久攻單于乃被甲
在樓上諸闕氏夫人數十皆以弓射外人外人反射中
單于鼻諸夫人頗死單于下騎傳戰大內夜過半木城
穿中人卻入土城乘城呼時康居兵萬餘騎分爲十餘
處四面環城亦相與應和夜數犇營不利輒卻平明四
面火起吏士喜大呼乘之鉦鼓聲動地康居兵引卻漢
兵四面推鹵楯並入土城中單于男女百餘人走入大
內漢兵縱火吏士爭入單于被創死軍候假丞杜勳斬
單于首得漢使節二及谷吉等所齎帛書諸鹵獲以畀

得者凡斬闕氏太子名王以下千五百一十八級生虜
百四十五人降虜千餘人賦予城郭諸國所發十五王
於是延壽湯上疏曰臣聞天下之大義當混爲一昔有
唐虞今有疆漢匈奴呼韓邪單于已稱北藩唯郅支單
于未伏其辜大夏之西以爲疆漢不能臣也郅支單于
慘毒行於民大惡通於天臣延壽臣湯將義兵行天誅
賴陛下神靈陰陽竝應天氣精明陷陳克敵斬郅支首
及名王以下宜縣頭臺街蠻夷邸間以示萬里明犯疆
漢者雖遠必誅事下有司丞相匡衡御史大夫繁延壽
以爲郅支及名王首更歷諸國蠻夷莫不聞知月令春
掩骼埋胔之時宜勿縣車騎將軍許嘉右將軍王商以
爲春秋夾谷之會優施笑君孔子誅之方盛夏手足異
門而出宜縣十日乃埋之有詔將軍議是初中書令石
顯嘗欲以姊妻延壽延壽不取及丞相御史亦惡其矯
制皆不與湯湯素食所鹵獲財物入塞多不法司隸校
尉移書道上繫吏士按驗之湯上疏言臣與吏士共誅
郅支單于幸得禽滅萬里振旅宜有使者迎勞道路今
司隸反逆收繫按驗是爲郅支報讎也上立出吏士令
縣道具酒食以過軍旣至論功石顯匡衡以爲延壽湯
擅興師矯制幸得不誅如復加爵土則後奉使者爭欲

乘危徼幸生事於蠻夷爲國招難漸不可開元帝內嘉延壽湯功而重違衡顯之議議久不決故宗正劉向上疏曰郅支單于囚殺使者吏士以百數事暴揚外國傷威毀重羣臣皆閔焉陛下赫然欲誅之意未嘗有忘西域都護延壽副校尉湯承聖指倚神靈總百蠻之君檻城郭之兵出百死入絕域遂蹈康居屠三重城拳斂侯之旗斬郅支之首縣旌萬里之外揚威昆山之西埽谷吉之恥立昭明之功萬夷懼伏莫不懼震呼韓邪單于見郅支已誅且喜且懼鄉風馳義稽首來賓願守北藩累世稱臣立千載之功建萬世之安羣臣之勳莫大焉

通志

卷四

列傳十三

七

昔周大夫方叔吉甫爲宣王誅獫狁而百蠻從其詩曰嘽嘽焯焯如霆如雷顯允方叔征伐獫狁蠻荆來威易曰有嘉折首獲匪其醜言美誅首惡之人而諸不順者皆來從也今延壽湯所誅震雖易之折首詩之雷霆不能及也論大功者不錄小過舉大美者不疵細瑕司馬法曰軍賞不逾月欲民速得爲善之利也蓋急武功重用人也吉甫之歸周厚賜之其詩曰吉甫宴喜旣多受祉來歸自鎬我行永久千里之鎬猶以爲遠况萬里之外其勤至矣延壽湯旣未獲受祉之報反屈捐命之功久挫於刀筆之前非所以勸有功厲戎士也昔齊桓前

有尊周之功後有滅項之罪君子以功覆過而爲之諱
行事貳師將軍李廣利相五萬之師靡億萬之費經四
年之勞而廩獲駿馬三十匹雖斬宛王母鼓之首猶不
足以復費其私罪惡甚多孝武以爲萬里征伐不錄其
過遂封拜兩侯三卿二千石百有餘人今康居國疆於
大宛郅支之號重於宛王殺使者罪甚於雷馬而延壽
湯不煩漢土不費斗糧比於貳師功德百之且常惠隨
欲擊之烏孫鄭吉迎自來之日逐猶皆裂土受爵故言
威武勤勞則大於方叔吉甫列功覆過則優於齊桓貳
師近事之功則高於安遠長羅而大功未著小惡數布

通志

卷四

列傳十三

四

臣切痛之宜以時解縣通籍除過勿治尊寵爵位以勸
有功於是天子下詔曰匈奴郅支單于背畔禮義留殺
漢使者吏士甚逆道理朕豈忘之哉所以優游而不征
者重動師衆勞將帥故隱忍而未有云也今延壽湯觀
便宜乘時利結城郭諸國擅興師矯制而征之賴天地
宗廟之靈誅討郅支單于斬獲其首及闕氏貴人名王
以下千數雖逾義干法內不煩一夫之役不開府庫之
藏因敵之糧以贍軍用立功萬里之外威震百蠻名顯
四海爲國除殘兵革之原息邊竟得以安然猶不免死
亡之患罪當在於奉憲朕甚閔之其赦延壽湯罪勿治

詔公卿議封焉議者以爲宜如軍法捕斬單于令匡衡石顯以爲郅支本亡逃失國竊號絕域非眞單于元帝取安遠侯鄭吉故事封千戶衡顯復爭乃封延壽爲義成侯賜湯爵關內侯食邑各三百戶加賜黃金百斤告上帝宗廟大赦天下拜延壽爲長水校尉湯爲射聲校尉延壽遷城門校尉護軍都尉薨於官成帝初卽位丞相衡復奏湯以吏二千石奉使顛命蠻夷中不正身以先下而盜所收康居財物戒官屬曰絕域事不覆校雖在赦前不宜處位湯坐免後湯上疏言康居侍子非王子也按驗實王子也湯下獄當死太中大夫谷永上疏訟湯曰臣聞楚有子玉得臣文公爲之仄席而坐趙有廉頗馬服彊秦不敢窺兵井陘近漢有郅都魏尙匈奴不敢南鄉沙幕由是言之戰克之將國之爪牙不可不重也蓋君子聞鼓聲之聲則思將率之臣竊見關內侯陳湯前使副西域都護忿郅支之無道閔王誅之不加策慮億億義勇奮發卒興師奔逝橫厲烏孫逾集都賴屠三重城斬郅支首報十年之逋誅雪邊吏之宿恥威震百蠻武暢西海漢元以來征伐方外之將未嘗有也今湯坐言事非是幽囚久繫歷時不決執憲之吏欲致之大辟昔白起爲秦將南拔郢都北阬趙括以纖介之

通志

卷四

列傳十三

四

過賜死杜郵秦民憐之莫不隕涕今湯親秉鉞席卷喋血萬里之外薦功祖廟告類上帝介冑之士靡不慕義以言事爲罪無赫赫之惡周書曰記人之功忘人之過宜爲君者也夫犬馬有勞於人尙加帷蓋之報況國之功臣者哉竊恐陛下忽於鼙鼓之聲不察周書之意而忘帷幄之施庸臣遇湯卒從吏議使百姓介然有秦民之恨非所以厲死難之臣也書奏天子出湯奪爵爲士伍後數歲西域都護段會宗爲烏孫所圍驛騎上書願發城郭燉煌兵以自救丞相王商大將軍王鳳及百僚議數日不決鳳言湯多籌策習外國事可問上召湯見宣室湯擊郅支時中寒病兩臂不詘申湯入見有詔毋拜示以會宗奏湯辭謝曰將相九卿皆賢材通明小臣罷癯不足以策大事上曰國家有急君其毋讓對曰臣以爲此必無可憂也上曰何以言之湯曰夫胡兵五而當漢兵一何者兵刃樸鈍弓弩不利今聞頗得漢巧然猶三而當一又兵法曰客倍而主人半然後敵今圍會宗者人衆不足以勝會宗唯陛下勿憂且兵輕行五十里重行三十里今會宗欲發城郭燉煌歷時乃至所謂報讎之兵非救急之用也上曰柰何其解可必乎度何時解湯知烏孫瓦合不能久攻故事不過數日因奏曰

已解矣詘指計其日曰不出五日當有吉語聞居四日
軍書到言已解大將軍王鳳奏以爲從事中郎莫府事
壹決於湯湯明法令善因事爲勢納說多從常受人金
錢作章奏卒以此敗初湯與將作大匠解萬年相善自
元帝時涓陵不復徙民起邑成帝起初陵數年後樂霸
陵曲亭南更營之萬年與湯議以爲武帝時工楊光以
所作數可意自致將作大匠及大司農中丞耿壽昌造
杜陵賜爵關內侯將作大匠乘馬延年以勞苦秩中二
千石今作初陵而營起邑居成大功萬年亦當蒙重賞
子公妻家在長安兒子生長長安不樂東方宜求徙可
得賜田宅俱善湯心利之卽上封事言初陵京師之地
最爲肥美何立一縣天下民不徙諸陵三十餘歲矣關
東富人益衆多規良田役使貧民可徙初陵以疆京師
衰弱諸侯又使中家以下得均貧富湯願與妻子家屬
徙初陵爲天下先於是天子從其計果起昌陵邑後徙
內郡國民萬年自詭三年可成後卒不就羣臣多言其
不便者下有司議皆曰昌陵因卑爲高積土爲山度便
房猶在平地上客土之中不保幽冥之靈淺外不固卒
徒工庸以鉅萬數至黓脂火夜作取土東山且與穀同
賈作治數年天下徧被其勞國家罷敞府藏空虛下至

通志

卷三

列傳十三

五

衆庶熬熬苦之故陵因天性據真土處執高敞旁近祖
考前又已有十年功緒宜還復故陵勿徙民上乃下詔
罷昌陵語在成紀丞相御史請廢昌陵邑中室奏未下
人以問湯第宅不徹得毋復發徙湯曰縣官且順聽羣
臣言猶且復發徙之也時成都侯商新爲大司馬衛將
軍輔政素不善湯商聞此語白湯惑衆下獄治案驗諸
所犯湯前爲騎都尉王莽上書言父早死獨不封母明
母弟苟參爲水衡都尉死子伋爲侍中參妻欲爲伋求
封湯受其金五十斤許爲求比上奏弘農太守張匡坐
臧百萬以上狡猾不道有詔卽訊恐下獄使人報湯湯
爲訟罪得逾冬月許謝錢二百萬皆此類也事在赦前
後東萊郡黑龍冬出人以問湯曰是所謂元門開微行
數出出入不時故龍以非時出也又言當復發徙傳相
語者十餘人丞相御史奏湯惑衆不道妄稱詐歸異於
上非所宜言大不敬廷尉增壽議以爲不道無正法以
所犯劇易爲罪臣下承用失其中故移獄廷尉無比者
先以聞所以正刑罰重人命也明主哀憫百姓下制書
罷昌陵勿徙吏民已申布湯妄以意相謂且復發徙雖
頗驚動所流行者少百姓不爲變不可謂惑衆湯稱詐

通志

卷宿

列傳十三

至一

虛設不然之事非所宜言大不敬也制曰廷尉增壽當是湯前有討郅支單于功其免湯爲庶人徙邊又曰故將作大匠萬年佞邪不忠妄爲巧詐多賦斂煩繇役興卒暴之作卒徒蒙辜死者連屬毒流衆庶海內怨望雖蒙赦令不宜居京師於是湯與萬年俱徙敦煌久之敦煌太守奏湯前親誅郅支單于威行外國不宜近邊塞詔徙安定議郎耿育上書言便宜因冤訟湯曰延壽湯爲聖漢揚鉤深致遠之威雪國家累年之恥討絕域不羈之君係萬里難制之虜豈有比哉先帝嘉之仍下明詔宜著其功改年垂歷傳之無窮應是南郡獻白虎邊

通志

卷宿

列傳十三

五

垂無警備會先帝寢疾然猶垂意不忘數使尙書責問丞相趣立其功獨丞相匡衡排而不予封延壽湯數百戶此功臣戰士所以失望也孝成皇帝承建業之基乘征伐之威兵革不動國家無事而大臣傾邪讒佞在朝曾不深惟本末之難以防未然之戒欲專主威排妒有功使湯塊然被冤拘囚不能自明卒以無罪老棄敦煌正當西域通道令威名折衝之臣旋踵及身復爲郅支遺虜所笑誠可悲也至今奉使外蠻者未嘗不陳郅支之誅以揚漢國之盛夫援人之功以懼敵棄人以身以快讒豈不痛哉且安不忘危盛必慮衰今國家素無文

帝累年節儉富饒之畜又無武帝薦延臯俊禽敵之臣獨有一陳湯耳假使異世不及陛下尙望國家追錄其功封表其墓以勸後進也湯幸得身當聖世功曾未久反聽邪臣鞭逐斤遠使亡逃分竄死無處所遠覽之士莫不計度以爲湯功累世不可及而湯過人情所有湯尙如此雖復破絕筋骨暴露形骸猶復制於唇舌爲疾妒之臣所係虜耳此臣所以爲國家尤戚戚也書奏天子還湯卒於長安死後數年王莽爲安漢公秉政旣內德湯舊恩又欲調皇太后以討郅支功尊元帝廟稱高宗以湯延壽前功大賞薄及假丞杜勳不賞迺益封延壽孫遷千六百戶追謚湯曰破胡壯侯封湯子馮爲破胡侯勳爲討狄侯

通志

卷宿

列傳十三

五

段會宗字子松天水上邽人也竟寧中以杜陵令五府舉爲西域都護騎都尉光祿大夫西域敬其威信三歲更盡還拜爲沛郡太守以單于當朝徙爲鴈門太守數年坐法免西域諸國上書願得會宗陽朔中復爲都護會宗爲人好大節矜功名與谷永相友善谷永閔其老復遠出予書戒曰足下以柔遠之令德復典都護之重職甚休甚休若子之材可優遊都城而取卿相何必勒功昆山之仄總領百蠻懷柔殊俗子之所長愚無以喻

雖然朋友以言贈行敢不略意方今漢德隆盛遠人賓服傅鄭甘陳之功沒齒不可復見願吾子因循舊貫毋求奇功終更亟還亦足以復鴈門之跡萬里之外以身爲本願詳思愚言會宗旣出諸國遣子弟郊迎小昆彌安日前爲會宗所立德之欲往謁諸翎侯止不聽遂至龜茲謁城郭甚親附康居太子保蘇匿率衆萬餘人欲降會宗奏狀漢遣衛司馬逢迎會宗發戍已校尉兵隨司馬受降司馬畏其衆欲令降者皆曰縛保蘇匿怨望舉衆亡去會宗更盡還以擅發戍已校尉之兵乏興有詔續論拜爲金城太守以病免歲餘小昆彌爲國民所殺諸翎侯大亂徵會宗爲左曹中郎將光祿大夫使安輯烏孫立小昆彌兄末振將定其國而還明年末振將殺大昆彌會病死漢恨誅不加元延中復遣會宗發戍已校尉諸國兵卽誅末振將太子番兵會宗恐大兵入烏孫驚番邱亡逃不可得留所發兵墊婁地選精兵三十弩徑至昆彌所在召番邱責以末振將骨肉相殺殺漢公主子孫末伏誅而死使者受詔誅番邱卽手劍擊番邱官屬以下驚恐馳歸小昆彌烏犁靡者末振將兄子也勒兵數千騎圍會宗會宗爲言來誅之意今圍守殺我如取漢牛一毛耳宛王郅支頭懸橐街烏孫所知

通志

卷福

列傳十三

五

也昆彌以下服曰末振將負漢誅其子可也獨不可告我令飲食之那會宗曰豫告昆彌逃匿之爲大罪卽飲食以付我傷骨肉恩故不先告昆彌以下號泣罷去會宗還奏事公卿議會宗權得便宜以輕兵入烏孫卽誅番邱宜明國威宜加重賞天子賜會宗爵關內侯黃金百斤是時小昆彌季父卑爰壺擁衆欲害昆彌漢復遣會宗使安輯與都護孫建并力明年會宗病死烏孫中年七十五矣城郭諸國爲發喪立祠焉班固曰自元狩之際張騫始通西域至于地節鄭吉建都護之號訖王莽世凡十八人皆以勇略選然其有功迹者具此廉褒以恩信稱郭舜以廉平著孫建用威重顯其餘無稱焉陳湯儻募不自收斂卒用困窮議者閔之

胡建字子孟河東人也孝武天漢中守軍正丞貧無車

馬常步與走卒起居所以尉薦走卒甚得其心時監軍

御史爲姦穿北軍壘垣以爲賈區爲買物之區也區廬舍也建欲誅

之乃約其走卒曰我欲與公有所誅吾言取之則取斬

之則斬於是當選士馬日監御史與護軍諸校列坐堂

皇上建從走卒趨至堂皇下拜謁因上堂皇走卒皆上

建指監御史曰取彼走卒前曳下堂皇建曰斬之遂斬

御史護軍諸校皆驚愕不知所以建亦已有成奏在其

通志

卷宿

列傳十三

五

懷中遂上奏曰臣聞軍法立武以威衆誅惡以禁邪今御史公穿軍垣以求賈利私買賣以與士市不立剛毅之心勇猛之節亡以帥先士大夫尤失理不公用文吏議不至重法黃帝李法曰

兵書之法李法官之號

壁壘已定穿窬

不繇路是謂姦人姦人者殺臣謹按軍法曰正亡屬將軍將軍有罪以聞二千石以下行法焉丞於用法疑執事不誘上臣謹以斬昧死以聞制曰司馬法曰國容不入軍軍容不入國何文吏也三王或誓於軍中欲民先成其慮也或誓於軍門之外欲民先意以待事也或將交刃而誓致民志也建又何疑焉建由是顯名後爲渭

通志

卷四

列傳十三

五

城令治甚有聲值昭帝幼皇后父上官將軍安與帝姊蓋主私夫丁外人相善外人驕恣怨故京兆尹樊福使客射殺之客藏公主廬吏不敢捕建將吏卒圍捕蓋主聞之與外人上官將軍多從奴客往犇射追吏吏散走主使僕射劾渭城游徼傷主家奴建報亡宅坐蓋主怒使人上書告建侵辱長公主射甲舍門知吏賊傷奴辟報故不窮審大將軍霍光寢其奏後光病上官氏代聽事下吏捕建建自殺吏民稱冤至今謂城立其祠

朱雲字游魯人也徙平陵少時通輕俠借客報仇長八尺餘容貌甚壯以勇力聞年四十乃變節從博士白子

友受易又事前將軍蕭望之受論語皆能傳其業好側儻大節當世以是高之元帝時琅邪貢禹爲御史大夫而華陰守丞嘉上封事言治道在於得賢御史之官宰相之副九卿之右不可不選平陵朱雲兼資文武忠正有智略可使以六百石秩試守御史大夫以盡其能上乃下其事問公卿太子少傅匡衡對曰大臣者國家之股肱萬姓所瞻仰明主所慎擇也傳曰下輕其上爵賤人圖柄臣則國家搖動而民不靜矣今嘉從守臣而圖大臣之位欲以匹夫徒步之人而超九卿之右非所以重國家尊社稷也自堯之用舜文王於太公猶試焉然後爵之又況朱雲者乎雲素好勇數犯法亡命受易頗有師道其行義未有以異今御史大夫禹潔白廉正經術通明有伯夷史魚之風海內莫不聞知而嘉猥稱雲欲令爲御史大夫妄相稱舉疑有姦心漸不可長宜下有司案驗以明好惡嘉竟坐之是時少府五鹿充宗貴幸爲梁邱易自宣帝時善梁邱氏說元帝好之欲考其同異令充宗與諸易家論充宗乘貴辨口諸儒莫能與抗皆稱疾不敢會有薦雲者召入攝齊升堂抗首而請音動左右旣論難連柱五鹿君故諸儒爲之語曰五鹿嶽嶽朱雲折其角絲是爲博士遷杜陵令坐故縱亡命

通志

卷四

列傳十三

五

會赦舉方正爲槐里令時中書令石顯用事與充宗爲黨百僚畏之唯御史中丞陳咸年少抗節不附顯等而與雲相結雲數上疏言丞相韋元成容身保位亡能往來而咸素毀石顯久之有司考雲疑風吏殺人羣臣朝見上問丞相以雲治行丞相元成言雲暴虛無狀時陳咸在前聞之以語雲雲上書自訟咸爲定奏草求下御史中丞事下丞相丞相部吏考立其殺人罪雲亡入長安復與咸計議丞相具發其事奏咸宿衛執法之臣幸得進見漏泄所聞以私語雲爲定奏草欲令自下治後知雲亡命罪人而與交通雲以故不得上於是下咸獄減死爲城旦咸雲遂廢錮終元帝之世至丞相安昌侯張禹以帝師位特進甚尊重雲上書求見公卿在前雲曰今朝廷大臣上不能匡主下亡以益民皆尸位素餐孔子所謂鄙夫不可與事君苟患失之亡所不至者也臣願賜尙方斬馬劍斷佞臣一人以厲其餘上問誰也對曰安昌侯張禹上大怒曰小臣居下訕上廷辱師傅罪死不赦御史將雲下雲攀殿檻折雲呼曰臣得下從龍逢比干游於地下足矣未知聖朝何如耳御史遂將雲去於是左將軍辛慶忌免冠解印綬叩頭殿下曰此臣素著狂直於世使其言是不可誅其言非固當容

通志

卷宿

列傳十三

堯

之臣敢以死爭慶忌叩頭流血上意解然後得已及治殿檻上曰勿易因而鞫之以旌直臣雲白是之後不復仕常居鄠田時出乘牛車從諸生所過皆敬事焉薛宣爲丞相雲往見之宣備賓主禮因畱雲宿從容謂雲曰在田野亡事且畱我東閭可以觀四方奇士雲曰小生乃欲相吏邪宣不敢復言其教授擇諸生然後爲弟子九江嚴望及望兄子元字仲能傳雲學皆爲博士望至泰山太守雲年七十餘終於家病不呼醫飲藥遺言以身服殮棺周於身土周於椁爲丈五墳葬平陵東郭外梅福字子真九江壽春人也少學長安明尚書穀梁春

通志

卷宿

列傳十三

卒

秋爲郡文學補南昌尉後去官歸壽春數因縣道上言變事求假軺傳詣行在所條對急政輒報罷是時成帝委任大將軍王鳳鳳專觀擅朝而京兆尹王章素忠直譏刺鳳爲鳳所誅王氏浸盛災異數見羣下莫敢正言福復上書曰臣聞箕子佯狂於殷而爲周陳洪範叔孫通遜秦歸漢制作儀品夫叔孫先非不忠也箕子非疏其家而畔親也不可爲言也昔高祖納善若不及從諫若轉圜聽言不求其能舉功不考其素陳平起於亡命而爲謀主韓信拔於行陣而達上將故天下之士雲合歸漢爭進奇異知者竭其策愚者盡其慮勇士極其節

怯夫勉其死合天下之知并天下之威是以舉秦如鴻毛取楚若拾遺此高祖所以亡敵於天下也孝文皇帝起於代谷非有周召之師伊呂之佐也循高祖之法加以恭儉當此之時天下幾平由是言之循高祖之法則治不循則亂何者秦爲亡道削仲尼之迹滅周公之軌壞井田除五等禮廢樂崩王道不通故欲行王道者莫能致其功也孝武皇帝好忠諫說至言出爵不待廉茂慶賜不須顯功是以天下布衣各厲志竭精以赴闕庭自街鬻者不可勝數漢家得賢於此爲盛使孝武皇帝聽用其計升平可致於是積尸暴骨快心胡越故淮南王安緣閒而起所以計慮不成而謀議泄者以衆賢聚於本朝故其大臣執陵不敢和從也方今布衣乃窺國家之隙見閒而起者蜀郡是也及山陽亡徒蘇令之羣蹈藉名都大郡求黨與索隨和而亡逃匿之意此皆輕重大臣亡所畏忌國家之權輕故匹夫欲與上爭衡也士者國之重器得士則重失士則輕詩云濟濟多士文王以寧廟堂之議非草茅所當言也臣誠恐身塗野草尸并卒伍故數上書求見輒報罷臣聞齊桓之時有以九九見者桓公不逆欲以致大也今臣所言非特九九也陛下距臣者三矣此天下士所以不至也昔秦武王

通志

卷第

列傳十三

空

好力任鄙叩關自鬻繆公行伯繇余歸德今欲致天下之士民有上書求見者輒使詣尙書問其所言言可采取者秩以升斗之祿賜以一束之帛若此則天下之士發憤懣吐忠言嘉謀日聞於上天下條貫國家表裏爛然可觀矣夫以四海之廣士民之數能言之類至衆多也然其雋桀指世陳政言成文章質之先聖而不謬施之當世合時務若此者亦無幾人故爵祿束帛者天下之底石高祖所以厲世磨鈍也孔子曰工欲善其事必先利其器至秦則不然張誹謗之罔以爲漢驅除倒持泰阿授楚其柄故誠能勿失其柄天下雖有不順莫觸

通志

卷四

列傳十三

空

其鋒此孝武皇帝所以辟地建功爲漢世宗也今不循伯者之道乃欲以三代選舉之法取當世之士猶察伯樂之圖求騏驥於市而不可得亦已明矣故高祖棄陳平之過而獲其謀晉文召天王齊桓用其讎亡益於時不顧逆順此所謂伯道者也一色成體謂之醇白黑雜合謂之駁欲以承平之法治暴秦之緒猶以鄉飲酒之禮理軍市也今陛下旣不納天下之言又加戮焉夫戴鵲遭害則仁鳥增逝愚者受戮則知士深退閒者愚民上疏多觸不急之法或下廷尉而死者衆自湯朔以來天下以言爲諱朝廷尤甚羣臣皆承順上指莫有執正

何以明其然也取民所上書陛下之所善試下之廷尉
廷尉必曰非所宜言大不敬以此卜之一矣故京兆尹
王章資質忠直敢面引廷爭孝元皇帝擢之以厲具臣
而矯曲朝及至陛下戮及妻子且惡惡止其身王章非
有反畔之辜而殃及家折直士之節結諫臣之舌羣臣
皆知其非然不敢爭天下以言爲戒最國家之大患也
願陛下循高祖之軌杜亡秦之路數御十月之歌畱意
亡逸之戒除不急之法下亡諱之詔博覽兼聽謀及疏
賤令深者不隱遠者不塞所謂闢四門明四目也且不
急之法誹謗之微者也往者不可及來者猶可追方今
君命犯而主威奪外戚之權日以益隆陛下不見其形
願察其聲建始以來日食地震以率言之三倍春秋水
災亡與比數陰盛陽微金鐵爲飛此何景也漢興以來
社稷三危呂霍上官皆母后之家也親親之道全之爲
右與之賢師良傅教以忠孝之道今乃尊寵其位授以
魁柄使之驕逆至於夷滅此失親親之大者也自霍光
之賢不能爲子孫慮故權臣易世則危書曰毋若火始
庸庸執陵於君權隆於主然後防之亦亡及已上遂不
納成帝久亡繼嗣福以爲宜建三統封孔子之世以爲
殷後復上書曰臣聞不在其位不謀其政政者職也位

通志

卷宿

列傳十三

空

卑言高者罪也越職觸罪危言世患雖伏質橫分臣之願也守職不言沒齒身全死之日尸未腐而名滅雖有景公之位伏歷千駟臣不貪也故願壹登文石之陛涉赤墀之塗當戶牖之法坐盡平生之愚慮亡益於時有遭於世此臣寢所以不安食所以忘味也願陛下深省臣言臣聞存人所以自立也壅人所以自塞也善惡之報各如其事昔者秦滅二周夷六國隱士不顯佚民不舉絕三統滅天道是以身危子殺厥孫不嗣所謂壅人以自塞者也故武王克殷未下車存五帝之後封殷於宋紹夏於杞明著三統示不獨有也是以姬姓半天下遷廟之主流出於戶所謂存人以自立者也今成湯不祀殷人亡後陛下繼嗣久微殆爲此也春秋經曰宋殺其大夫穀梁傳曰其不稱名姓以其在祖位尊之也此言孔子故殷後也雖不正統封其子孫以爲殷後禮亦宜之何者諸侯尊宗聖庶奪適傳曰賢者子孫宜有土而況聖人又殷之後哉昔成王以諸侯禮葬周公而皇天動威雷風著災今仲尼之廟不出闕里孔氏子孫不免編戶以聖人而歆匹夫之祀非皇天之意也今陛下誠能據仲尼之素功以封其子孫則國家必獲其福又陛下之名與天亡極何者追聖人素功封其子孫未有

通志

卷宿

列傳十三

竇

法也後聖必以爲則不滅之名可不勉哉福孤遠又譏切王氏故終不見納初武帝時始封周後姬嘉爲周子南君元帝時尊周子南君爲周承休侯位次諸侯王使諸大夫博士求殷後分散爲十餘姓郡國往往得其大家推求子孫絕不能紀時匡衡議以爲王者存三王後所以尊其先王而通三統也其犯誅絕之罪者絕而更封他親爲始封君上承其王者之始祖春秋之義諸侯不能守其社稷者絕今宋國已不守其統而失國矣則宜更立殷後爲始封君而上承湯統非當繼宋之絕侯也宜明得殷後而已今之故宋推求其嫡久遠不可得

通志

卷宿

列傳十三

空

雖得其嫡嫡之先已絕不當得立禮記孔子曰丘般人也先師所共傳宜以孔子世爲湯後上以其語不經遂見寢至成帝時梅福復言宜封孔子後以奉湯祀綏和元年立二王後推述古文以左氏穀梁世本禮記相明遂下詔封孔子世爲殷紹嘉公語在成紀是時福居家常以讀書養性爲事至元始中王莽顛政福一朝棄妻子去九江至今傳以爲仙其後人有見福於會稽者變名姓爲吳門市卒云

云敞字幼孺平陵人也師事同縣吳章章治尚書經爲博士平帝以中山王卽帝位年幼王莽秉政自號安漢

公以平帝爲成帝後不得顧私親帝母及外家衛氏皆
留中山不得至京師莽長子宇非莽隔絕衛氏恐帝長
大後見怨宇與吳章謀夜以血塗莽第門若鬼神之戒
冀以懼莽章欲因對其咎事發覺莽殺宇誅滅衛氏謀
所聯及死者百餘人章坐要斬磔尸東市門初章爲當
世名儒教授尤盛弟子千餘人莽以爲惡人黨皆當禁
錮不得仕宦門人盡更名他師敞時爲大司徒掾自劾
吳章弟子抱章尸歸棺斂葬之京師稱焉車騎將軍王
舜高其志節比之樂布表奏以爲掾薦爲中郎諫大夫
莽篡位王舜爲太師復薦敞可輔職以病免唐林言敞
可典郡擢爲魯郡大尹更始時安車徵敞爲御史大夫
復病免去卒于家

雋不疑

雋祖
亮反

字曼倩勃海人也治春秋爲郡文學進退

必以禮名聞州郡武帝末郡國盜賊羣起暴勝之爲直
指使者衣繡衣持斧逐捕盜賊督課郡國東至海以軍

興誅不從命者威震州郡勝之素聞不疑賢至渤海遣

吏請與相見不疑冠進賢冠帶櫛具劍

古者長劍首以
玉作并鹿盧形

上刻木作山形似蓮花初生時
未敷也今大劍木首其狀似此

佩環玦褱衣博帶盛服

至門上謁門下欲使解劍不疑曰劍者君子武備所以
衛身不可解請退吏白勝之勝之開閣延請望見不疑

通志

卷四

列傳十三

矣

容貌尊嚴衣冠甚偉勝之躡履起迎登堂坐定不疑據地曰竊伏海瀕聞暴公子威名舊矣今乃承顏接辭凡爲吏太剛則折太柔則廢威行施之以恩然後樹功揚名永終天祿勝之知不疑非庸人敬納其戒深接以禮意問當世所施行門下諸從事皆州郡選吏伏側聽不疑莫不驚駭至昏夜罷去勝之遂表薦不疑徵詣公車拜爲青州刺史久之武帝崩昭帝卽位而齊孝王孫劉澤交結郡國豪桀謀反欲先殺青州刺史不疑發覺收捕皆伏其辜擢爲京兆尹賜錢百萬京兆吏民敬其威信每行縣錄囚徒錄力還其母輒問不疑有所平反反音

通志

卷四

列傳十三

七

番從輕也活幾何人卽不疑多有所平反母喜笑爲飲食語言異於他時或無所出母怒爲不食故不疑爲吏嚴而不殘始元五年有一男子乘黃犢車建黃旒衣黃襜褕著黃帽詣北闕自謂衛太子公車以聞詔使公卿將軍二千石雜識視長安中吏民聚觀者數萬人右將軍勒兵闕下以備非常丞相御史二千石至者竝莫敢發言京兆尹不疑後到叱吏收縛或曰是非未可知且安之不疑曰諸君何患於衛太子昔太子蒯瞶違命出奔輒距而不納春秋是之衛太子得罪先帝亡不卽死今來自詣此罪人也遂送詔獄天子與大將軍光聞而嘉之

曰公卿大臣當用經術士明於大誼由是名聲重於朝廷在位者皆自以爲不及也大將軍光欲以女妻之無疑固辭不肯當久之以病免終於家京師紀之後趙廣漢爲京兆尹言我禁姦止邪行於吏民至於朝廷事不及不疑遠甚廷尉驗治何人竟得姦詐本夏陽人姓成名方遂居湖以卜筮爲事有故太子舍人嘗從方遂卜謂曰子狀貌甚似太子方遂心利其言幾得以富貴卽詐自稱詣闕廷尉逮召鄉里識知者張宗祿等方遂坐誣罔不道要斬東市一姓張名延年

疏廣字仲翁東海蘭陵人也少好學明春秋家居教授

通志

卷宿

列傳十三

亥

學者自遠方至徵爲博士太中大夫地節三年立皇太子選丙吉爲太傅廣爲少傅數月吉遷御史大夫廣徙爲太傅廣兄子受字公子亦以賢良舉爲太子家令受好禮恭謹敏而有辭宣帝幸太子宮受迎謁應對及置酒宴奉觴上壽辭理閑雅上甚歡說頃之拜受爲少傅太子外祖父特進平恩侯許伯以爲太子少白使其弟中郎將舜監護太子家上以問廣廣對曰太子國儲副君師友必求天下英俊不宜獨親外家許氏且太子自有太傅少傅官屬已備今復使舜護太子家視陋非所以廣太子德於天下也上善其言以語丞相魏相相免

冠謝曰此非臣等所能及廣由是見器重數受賞賜太子每朝因進見大傅在前少傅在後父子竝爲師傅朝廷以爲榮在位五歲皇太子年十二通論語孝經廣謂受曰吾聞知足不辱知止不殆功遂身退天之道也今仕宦至二千石宦成名立如此不去懼有後悔豈如父子相隨出關歸老故鄉以壽命終不亦善乎受叩頭曰從大人議卽日父子俱移病滿三月賜告廣遂稱篤上疏乞骸骨上以其年篤老皆許之加賜黃金二十斤皇太子贈以五十斤公卿大夫故人邑子設祖道供張東都門外

長安東郭門

送者車數百兩辭決而去及道觀門者

通志

卷信

列傳十三

完

皆曰賢哉二大夫或歎息爲之下泣廣旣歸鄉里日令家共具設酒食請族人故舊賓客與相娛樂數問其家金餘尙有幾所趣賣以共其歲餘廣子孫竊謂其昆弟老人廣所信愛者曰子孫幾及君時頗立產業基陞今日飲食費且盡宜從丈人所勸說君買田宅老人卽以閒暇時爲廣言此計廣曰吾豈老諄不念子孫哉顧自有舊田廬令子孫勤力其中足以共衣食與凡人齊今復增益之以爲贏餘但教子孫怠墮耳賢而多財則損其志愚而多財則益其過且夫富者衆之所怨也吾旣無以教化子孫不欲益其過而生怨又此金者聖主所

以惠養老臣也故樂與鄉黨宗族共享其賜以盡吾餘日不亦可乎於是族人說服皆以壽終

于定國字曼倩東海鄒人也其父于公爲縣獄史郡決曹決獄平羅文法者于公所決皆不恨郡中爲之生立祠號曰于公祠東海有孝婦少寡亡子養姑甚謹姑欲嫁之終不肯姑謂鄰人曰孝婦事我勤苦哀其亡子守寡我老久縈丁壯柰何其後姑自經死姑女告吏婦殺我母吏捕孝婦孝婦辭不殺姑吏驗治孝婦自誣服具獄上府于公以爲此婦養姑十餘年以孝聞必不殺也太守不聽于公爭之弗能得乃抱其具獄哭於府上因

通志

卷四

列傳十三

七

辭疾去太守竟論殺孝婦郡中枯旱三年後太守至卜筮其故于公曰孝婦不當死前太守彊斷之咎儻在是乎於是太守殺牛自祭孝婦冢因表其墓大立大雨歲熟郡中以此大敬重于公定國少學法於父父死後定國亦爲獄史郡決曹補廷尉史以選與御史中丞從事治反者獄以材高舉侍御史遷御史中丞會昭帝崩昌邑王徵卽位行淫亂定國上書諫後王廢宣帝立大將軍霍光領尙書事條奏羣臣諫昌邑王者皆超遷定國由是爲光祿大夫平尙書事甚見任用數年遷水衡都尉超爲廷尉定國乃迎師學春秋身執經北面之弟子

禮爲人謙恭尤重經術士雖卑賤徒步往過定國皆與均禮恩敬甚備學士咸稱焉其決疑平法務在哀矜罪疑從輕加審慎之心朝廷稱之曰張釋之爲廷尉天下無冤民于定國爲廷尉民自以不冤定國食酒至數石不亂冬月治請讞飲酒益精明爲廷尉十八歲遷御史大夫甘露中代黃霸爲丞相封西平侯元帝立以定國任職舊臣敬重之時陳萬年爲御史大夫與定國竝位八年論議無所拂後貢禹代爲御史大夫數處駁議定國明習政事率常丞相議可然上始卽位關東連年被災害民流入關言事者歸咎於大臣上於是數以朝日

通志

卷第

列傳十三

三

引見丞相御史入受詔條責以職事定國上書謝罪永光元年春霜夏寒日青亡光上復以詔條責丞相御史定國惶恐上書自劾歸侯印乞骸骨不許遂稱篤固辭上乃賜安車駟馬黃金六十斤罷就第數年七十薨諡曰安侯子永嗣少時嗜酒多過失年且三十乃折節修行以父任爲侍中中郎將長水校尉定國死居喪如禮孝行聞由是以列侯爲散騎光祿勳至御史大夫尙館陶公主施施者宣帝長女成帝姑也賢有行永以選尙焉上方欲相之會永薨子恬嗣不肖薄於行始定國父子公其閭門壞父老方共治之于公謂曰少高大閭

門令容駟馬高蓋車我治獄多陰德未嘗有所冤子孫必有興者至定國爲丞相永爲御史大夫封侯傳世云薛廣德字長卿沛郡相人也以魯詩教授楚國龔勝舍師事焉蕭望之爲御史大夫除廣德爲屬數與論議器之薦廣德經行宜充本朝爲博士論石渠遷諫大夫代貢禹爲長信少府御史大夫廣德爲人溫雅有醞藉及爲三公直言諫爭始拜旬日閒上幸甘泉郊泰畤禮畢因畱射獵廣德上書諫曰竊見關東困極民人流離陛下日撞亡秦之鍾聽鄭衛之樂臣誠悼之今士卒暴露從官勞倦願陛下亟反宮思與百姓同憂樂天下幸甚

通志

卷四

列傳十三

三

上卽日還其秋上酎祭宗廟出便門欲御樓船廣德當乘輿車免冠頓首曰宜從橋詔曰大夫冠廣德曰陛下不聽臣臣自刎以血汙車輪陛下不得入廟矣上不說先驅光祿大夫張猛進曰臣聞主聖臣直乘船危就橋安聖主不乘危御史大夫言可聽上曰曉人不當如是邪乃從橋後月餘以歲惡民流與丞相定國大司馬車騎將軍史高俱乞骸骨皆賜安車駟馬黃金六十斤罷廣德爲御史大夫凡十月免東歸沛太守迎之界上沛以爲榮縣其安車傳子孫

平當字子思祖父以貲百萬自下邑徙平陵當少爲大

行治禮丞功次補大鴻臚文學察廉爲順陽長柁邑令以明經爲博士公卿薦當論議通明給事中每有災異當輒傳經術言得失文雅雖不能及蕭望之匡衡然指意略同自元帝時韋元成爲丞相奏罷太上皇寢廟園當上書言臣聞孔子曰如有王者必世而後仁三十年之間道德和洽制禮興樂災害不成禍亂不作今聖漢受命而王繼禮承業二百餘年孜孜不怠政令清矣然風俗未和陰陽未調災害數見意者大本有不立與何德化休徵不應之久也禍福不虛必有因而至者焉宜深迹其道而務修其本昔者帝堯南面而治先克明後德以親九族而化及萬國孝經曰天地之性人爲貴人之行莫大有孝孝莫大於嚴父嚴父莫大於配天則周公其人也夫孝子善述人之志周公旣成文武之業而制作禮樂修嚴父配天之事知文王不欲以子臨父故推而序之上極於后稷而以配天此聖人之德亡以加於孝也高皇帝聖德受命於天下尊太上皇猶周文武之追王太王王季也此漢之始祖後嗣所宜尊奉以廣盛德孝之至也書云正稽古建功立事可以永年傳有亡窮上納其言下詔復太上皇寢廟園頃之使行流民幽州舉奏刺史二千石勞徠有意者言勃海鹽池可且

通志

卷首

列傳十三

室

勿禁以救民急所過見稱舉奉使者十一人爲最遷丞相司直坐法左遷朔方刺史復徵入爲太中大夫給事中繫遷長信少府大鴻臚光祿勳先是太后姊子衛尉淳于長白言昌陵不可成下有司議當以爲作治連年可遂就上旣罷昌陵以長首建忠策復下公卿議封長當又以爲長雖有善言不應封爵之科坐前議不正左遷鉅鹿太守後上遂封長當以經明禹貢使行河爲騎都尉領河隄哀帝卽位徵當爲光祿大夫諸吏散騎復爲光祿勳御史大夫至丞相以冬月賜爵關內侯明年春上使使者召欲封當當病篤不應召室家或謂當不

通志

卷四

列傳十三

五

可彊起受侯印爲子孫邪當曰吾居大位已負素餐之責矣起受侯印還臥而死死有餘罪今不起者所以爲子孫也遂上書乞骸骨上報曰朕選於衆以君爲相視事日寡輔政未久陰陽不調冬無大雪旱氣爲災朕之不德何必君罪君何疑而上書乞骸骨歸關內侯爵邑使尙書令譚賜君養牛一上尊酒十石君其勉致醫藥以自持後月餘卒子晏以明經歷位大司徒封防鄉侯漢興唯韋平父子至宰相

彭宣字子佩淮陽陽夏人也治易事張禹舉爲博士遷東平太傅禹以帝師見尊信薦宣經明有威重可任政

事繇是入爲右扶風遷廷尉以王國人出爲太原太守
數年復入爲大司農光祿勳右將軍哀帝卽位徙爲左
將軍歲餘上欲令丁傅處爪牙官乃策宣曰有司數奏
言諸侯國人不得宿衛將軍不宜典兵馬處大位朕唯
將軍任漢將之重而子又前取淮陽王女婚姻不絕非
國之制使光祿大夫曼賜將軍黃金五十斤安車駟馬
其上左將軍印綬以關內侯歸家宣罷數歲諫大夫鮑
宣數薦宣會元壽元年正月朔日蝕鮑宣復言上乃召
宣爲光祿大夫遷御史大夫轉爲大司空封長平侯會
哀帝崩新都侯王莽爲大司馬秉政專權宣上書言三
公鼎足承君一足不任則覆亂美實臣資性淺薄年齒
老眊數伏疾病昏亂遺忘願上大司空長平侯印受乞
骸骨歸鄉里俟宣溝壑莽白太后策免宣令上大司空
印綬便就國莽恨宣求退故不賜黃金安車駟馬宜居
國數歲薨諡曰頃侯傳子至孫王莽敗乃絕

王吉字子陽琅邪臯虞人也少好學明經以郡吏舉孝
廉爲郎補若盧右丞遷雲陽令舉賢良爲昌邑中尉而
王好游獵驅馳國中動作亡節吉上疏諫曰臣聞古者
師日行三十里吉行五十里詩云匪風發兮匪車揭兮
顧瞻周道中心怛兮說曰是非古之風也發發者是非

通志

卷宿

列傳十三

五

古之車也揭揭者蓋傷之也今者大王幸方與曾不半日而馳二百里百姓頗廢耕桑治道牽馬臣愚以爲民不可數變也昔召公述職當民事時舍於棠下而聽斷焉是時人皆得其所後世思其仁恩至瘁不伐甘棠甘棠之詩是也大王不好書術而樂逸游馮式搏銜馳騁不止口倦乎叱咤手苦於箠轡身勞瘁車輿朝則冒霧露晝則被塵埃夏則爲大暑之所暴炎冬則爲風寒之所畏薄數以稟脆之玉體犯勤勞之煩毒非所以全壽命之宗也又非所以進仁義之隆也夫廣夏之下細旃之上明師居前勸誦在後上論唐虞之際下及殷周之

通志

卷四

列傳十三

五

盛考仁聖之風習治國之道訢訢焉發憤忘食日新厥德其樂豈徒銜檠之間哉休則俛仰誠信以利形進退步趨以實下吸新吐故以練藏專意積精以適神於以養生豈不長哉大王誠留意如此則心有堯舜之志體有喬松之壽美聲廣譽登而上聞則福祿其臻而社稷安矣皇帝仁聖至今思慕未怠於宮館園池弋獵之樂未有所幸大王宜夙夜念此以承聖意諸侯骨肉莫親大王大王於屬則子也於位則臣也一身而二任之責加焉恩愛行義纖介有未具者於以上聞非享國之福也臣言愚贛願大王察之王賀雖不遵道然猶知敬禮

吉乃下令曰寡人造行不能無情中尉甚忠數輔吾過使謁者千秋賜中尉牛肉五百斤酒五石脯五束其後復放從自若吉輒諫爭甚得輔弼之義雖不治民國中莫不敬重焉久之昭帝崩亡嗣大將軍霍光秉政遣大鴻臚宗正迎昌邑王吉卽奏書戒王曰臣聞高宗諒闇三年不言今大王以喪事徵宜日夜哭泣並悲哀而已慎毋有所發且何獨喪事凡南面之君何言哉天不言四時行焉百物生焉願大王察之大將軍仁愛勇智忠信之德天下莫不聞事孝武皇帝二十餘年未嘗有過先

通志

卷四

列傳十三

七

之中布政施教海內晏然雖周公伊尹亡以加也今帝崩亡嗣大將軍惟思可以奉宗廟者攀援而立大王其仁厚豈有量哉臣願大王事之敬之政事壹聽之大王垂拱而已願留意常以爲念王旣到卽位二十餘日以行淫亂廢昌邑羣臣坐在國時不舉奏王罪過令漢朝不聞知又不能輔道陷王大惡皆下獄誅唯吉與郎中令龔遂以忠直數諫正得減死髡爲城旦起家復爲益州刺史病去官復徵爲博士諫大夫是時宣帝頗修武帝故事宮室車服盛於昭帝時外戚許史王氏貴寵而上躬親政事任用能吏吉上疏言得失曰陛下躬聖質

總萬方帝王圖籍日陳于前惟思世務將興太平詔書每下民欣然若更生臣伏而思之可謂至恩未可謂本務也欲治之主不世出公卿幸得遭遇其時言聽諫從然未有建萬世之長策舉明主於三代之隆者也其務在於期會簿書斷獄聽訟而已此非太平之基也臣聞聖王宣德流化必自近始朝廷不備難以言治左右不正難以化遠民者弱而不可勝愚而不可欺也聖主獨行於深宮得則天下稱誦之失則天下咸言之行發於近必見於遠故謹選左右審擇所使左右所以正身也所使所以宣德也詩云濟濟多士文王以寧此其本也

通志

卷四

列傳十三

支

春秋所以大一統者六合同風九州共貫也今俗吏所以牧民者非有禮義科指可世世通行者也獨設刑法以守之其欲治者不知所繇以意穿鑿各取一切權譎自任故一變之後不可復修也是以百里不同風千里不同俗戶異政人殊服詐僞萌生刑罰亡極質樸日銷恩愛浸薄孔子曰安上治民莫善於禮非空言也王者未制禮之時引先王禮宜於今者而用之臣願陛下承天心發大業與公卿大臣延及儒生述舊禮明王制驅一世之民躋之仁壽之域則俗何以不若成康壽何以不若高宗竊見當世趨務不合於道者謹條奏唯陛下

財擇焉吉意以爲夫婦人倫大綱夭壽之萌也世俗嫁娶太早未知爲人父母之道而有子是以教化不明而民多天聘妻送女亡節則貧人不及故不舉子又漢家列侯尚公主諸侯則國人承翁主使男事女夫詘於婦逆陰陽之位故多女亂古者衣服車馬貴賤有章以褒有德而別尊卑今上下僭差人人自制是以貪財趨利不畏死亡周之所以能致治刑措而不用者以其禁邪於冥冥絕惡於未萌也又言舜湯不用三公九卿之世而舉皐陶伊尹不仁者遠今使俗吏得任子弟率多驕驚不通古今至於積功治人亡益於民此伐檀所爲作

通志

卷宿

列傳十三

五

也宜明選求賢除任子之令外家及故人可厚以財不宜居位去角抵減樂府省尙方明視天下以儉古者工不造瑯琢商不通侈靡非工商之獨賢政教使之然也民見儉則歸本本立則末成其指如此上以其言迂濶不甚寵異也吉遂謝病歸琅邪始吉少時學問居長安東家有大棗樹垂吉庭中吉婦取棗以啖吉吉後知之乃去婦東家聞而欲伐其樹鄰里共止之因固請吉令還婦里中爲之語曰東家有樹王陽去婦東家棗完去婦復還其厲志如此吉與貢禹爲友世稱王陽在位貢禹彈冠言其取捨同也元帝初卽位遣使者徵貢禹與

吉吉年老道病卒上悼之復遣使者弔祠云初吉兼通五經能爲騶氏春秋以詩論語教授好梁邱賀說易令子駿受焉駿以孝廉爲郎左曹陳咸薦駿賢父子經明行修宜顯以厲俗光祿勳匡衡亦舉駿有專對村遷諫大夫使責淮陽憲王遷趙內史吉坐昌邑王被刑後戒子孫毋爲王國吏故駿道病免官歸起家復爲幽州刺史遷司隸校尉奏免丞相匡衡遷少府八歲成帝欲大用之出駿爲京兆尹試以政事先是京兆有趙廣漢張敞王尊王章至駿皆有能名故京師稱曰前有趙張後有三王而薛宣從左馮翊代駿爲少府會御史大夫缺谷永奏言聖王不以名譽加於實效考績用人之法薛宣政事已試上然其議宣爲少府月餘遂超御史大夫至丞相駿乃代宣爲御史大夫竝居位六歲病卒翟方進代駿爲御史大夫數月薛宣免遂代爲丞相衆人爲駿恨不得封侯駿爲少府時妻死因不復娶或問之駿曰德非曾參子非華元亦何敢娶駿子崇以父任爲郎歷刺史郡守治有能名建平三年以河南太守徵入爲御史大夫數月是時成帝舅安成恭侯夫人放寡居共養長信宮坐祝詛下獄崇奏封事爲放言放外家解氏與崇爲婚哀帝以崇爲不忠誠策免崇左遷爲大司農

通志

卷宿

列傳十三

午

後徙衛尉左將軍平帝卽位王莽秉政大司空彭宣乞骸骨罷崇代爲大司空封扶平侯歲餘崇復謝病乞骸骨皆避王莽莽遣就國歲餘爲傅婢所毒薨國除自吉至崇世名清廉然材器名稱稍不能及父而祿位彌隆皆好車馬衣服其自奉養極爲鮮明而亡金銀錦繡之物及遷徙去處所載不過囊衣不畜積餘材去位家居亦布衣蔬食天下服其廉而怪其奢故俗傳王陽能作黃金

貢禹字少翁琅邪人也以明經絮行著聞徵爲博士涼

州刺史病去官復舉賢良爲河南令歲餘以職事爲府

通志

卷四

列傳十三

全

官所責免冠謝禹曰冠壹免安可復冠也遂去官元帝初卽位徵禹爲諫大夫數虛已間以政事是時年歲不登郡國多困禹奏言古者宮室有制宮女不過九人秣馬不過八匹牆塗而不凋本摩而不刻車輿器物皆不文畫苑囿不過數十里與民共之任賢使能什一而稅亡宅賦斂絲戍之役使民歲不過三日千里之內自給千里之外各置貢職而已故天下家給人足頌聲竝作至高祖孝文孝景皇帝循古節儉宮女不過十餘廄馬百餘匹孝文皇帝衣絺履革器亡凋文金銀之飾後世爭爲奢侈轉轉益甚臣下亦相放效衣服履袴刀劍亂

於主上主上時臨朝入廟衆人不能別異甚非其宜然
非自知奢僭也猶魯昭公曰吾何僭矣今大夫僭諸侯
諸侯僭天子天子過天道其日久矣承衰救亂矯復古
化在於陛下臣愚以爲盡如太古難宜少放古以自節
焉論語曰君子樂節禮樂方今宮室已定亡可柰何矣
其餘盡可減損故時齊三服官輸物不過十笥方今齊
三服官作工各數千人一歲費數鉅萬蜀廣漢主金銀
器歲各用五百萬三工官官費五千萬東西織室亦然
廄馬食粟將萬匹臣禹嘗從之東宮見賜杯案盡文畫
金銀飾非當所以賜食臣下也東宮之費亦不可勝計

通志

卷四

列傳十三

五

天下之民所爲大饑餓死者是也今民大饑而死死又
不葬爲犬豬所食人至相食而廄馬食粟苦其大肥氣
盛怒至乃日步作之王者受命於天爲民父母固當若
此乎天不見邪武帝時又多取好女至數千人以填後
宮及棄天下昭帝幼弱霍光專事不知禮正妄多藏金
錢財物鳥獸魚鼈牛馬虎豹生禽凡百九十物盡瘞藏
之又皆以後宮女置於園陵大失禮逆天心又未必稱
武帝意也昭帝晏駕光復行之至孝宣皇帝時陛下惡
有所言羣臣亦隨故事甚可痛也故使天下承化取女
皆大過度諸侯妻妾或至數百人豪富吏民畜歌者至

數十人是以內多怨女外多曠夫及衆庶葬埋皆虛地上以實地下其過自上生皆在大臣循故事之罪也唯陛下深察古道從其儉者大減損乘輿服御器物三分去二產子多少有命審察後宮擇其賢者畱二十人餘悉歸之及諸陵園女亡子者宜悉遣獨杜陵宮人數百誠可哀憐也廋馬可亡過數十匹獨舍長安城南苑地以爲田獵之囿自城西南至山西至鄠皆復其田以與貧民方今天下饑饉可亡大白損減以救之稱天意乎天生聖人蓋爲萬民非獨使自娛樂而已也故詩曰天難諶斯不易惟王上帝臨汝毋貳爾心當仁不讓獨可以聖心參諸天地揆之往古不可與臣下議也若其阿意順指隨君上下臣禹不勝拳拳不敢不盡愚心天子納善其忠乃下詔令太僕減食穀馬水衡減食肉獸省宜春下苑以與貧民又罷角抵諸戲及齊三服官遷禹爲光祿大夫頃之禹復上書曰臣禹年老貧窮家貲不滿萬錢妻子糠豆不贍襁褐不完有田百三十畝陛下過意徵臣臣賣田百畝以供車馬至拜爲諫大夫秩八百石奉錢月九千二百稟食太官又蒙賞賜四時雜繪絲絮衣服酒肉諸果物德厚甚深疾病侍醫臨治賴陛下神靈不死而活又拜爲光祿大夫秩二千石奉錢月

萬二千祿賜愈多家日以益富身日以益尊誠非草茅
愚臣所當蒙也伏自念終亡以報厚德日夜慙媿而已
臣禹犬馬之齒八十一血氣衰竭耳目不聰明非復能
有補益所謂素餐尸祿汙朝之臣也自痛去家三千里
凡有一子年十二非有在家爲具棺椁者也誠恐一旦
隳仆氣竭不復自還汗席薦於宮室骸骨棄捐孤魂不
歸不勝私願願乞骸骨及身生歸鄉里死亡所恨天子
報曰朕以生有伯夷之廉史魚之直守經據古不阿當
世孳孳於民俗之所寡故親近生幾參國政今未得久

聞生之奇論也而云欲退意豈有所恨與將在位者與

通志

卷四

列傳十三

五

生殊乎往者嘗令金徹語生欲及生時祿生之子旣已
論矣今復云子少夫以王命辦護生家雖百子何以加
傳曰亡懷土何必思故鄉生其彊飯慎疾以自輔後月
餘以禹爲長信少府會御史大夫陳萬年卒禹代爲御
史大夫列於三公自禹在位數言得失書數十上禹以
爲古民無賦算口錢起武帝征伐四夷重賦於民民產
子三歲則出口錢故民重困至於生子輒殺甚可悲痛
宜令兒七歲去齒乃出口錢年二十乃算又言古者不
以金銀爲幣專意於農故一夫不耕必有受其饑者今
漢家鑄錢及諸鐵官皆置吏卒徒攻山取銅錢一歲功

十萬人已上中農食七人是七十萬人當受其饑也鑿池數百丈銷陰氣之精地臧空虛不能含氣出雲斬伐林木亡有時禁水旱之災未必不繇此也自五銖錢起以來七十餘年民坐盜鑄錢被刑者衆富人積錢滿室猶亡厭足民心動搖商賈求利東西南北各用智巧好衣美食歲有十二之利而不出租稅農夫父子暴露中野不避寒暑梓中把土手足胼胝已奉穀租又出彙稅鄉部私求不可勝供故民棄本逐末耕者不能半貧民雖賜之田猶賤賣以買窮則起爲盜賊何者末利深而惑於錢也是以姦邪不可禁其原皆起於錢也疾其末

通志

卷四

列傳十三

全

者絕其本宜罷采珠玉金銀鑄錢之官亡復以爲幣市井勿得販賣除其租銖之律租稅祿賜皆以布帛及穀使百姓壹歸於農復古道便又言諸離宮及長樂宮衛可減其大半以寬絲役又諸宮奴婢十萬餘人戲游亡事稅良民以給之歲費五六鉅萬宜免爲庶人廩食令代關東戍卒乘北邊亭塞候望又欲令近臣自諸曹侍中以上家亡得私販賣與民爭利犯者輒免官削爵不得仕宦禹又言孝文皇帝時貴寵廉絮賤貪汙賈人贅壻及吏坐臧者皆禁錮不得爲吏賞善罰惡不阿親戚罪白者伏其誅疑者以與民亡贖罪之法故令行禁止

海內大化天下斷獄四百與刑錯無異武帝始臨天下
尊賢用士闢地廣境數千里自見功大威行遂從者欲
用度不足乃行壹切之變使犯法者贖罪入穀者補吏
是以天下奢侈官亂民貧盜賊竝起亡命者衆郡國恐
伏其誅則擇便巧史書習於計簿能欺上府者以爲右
職姦軌不勝則取勇猛能操切百姓者以苛暴威服下
者使居大位故亡義而有財者顯於世欺謾而善書者
尊於朝諂逆而勇猛者貴於官故俗皆曰何以孝弟爲
財多而光榮何以禮義爲史書而仕宦何以謹慎爲勇
猛而臨官故黥劓而髡鉗者猶復攘臂爲政於世行雖
犬彘家富執足目指氣使是爲賢耳故謂居官而置富
者爲雄桀處姦而得利者爲壯士兄勸其弟父勉其子
俗之壞敗乃至於是察其所以然者皆以犯法得贖罪
求士不得眞賢相守崇財利誅不行之所致也今欲興
至治致太平宜除贖罪之法相守選舉不以實及有臧
者輒行其誅亡但免官則爭盡力爲善貴孝弟賤賈人
進眞賢舉實廉而天下治矣孔子匹夫之人耳以樂道
正身不解之故四海之內天下之君微孔子之言亡所
折中況乎以漢地之廣陛下之德處南面之尊秉萬乘
之權因天地之助其於變世易俗調和陰陽陶冶萬物

化正天下易於決流抑隊自成康以來幾且千歲欲爲
治者甚衆然而太平不復興者何也以其舍法度而任
私意奢侈行而仁義廢也陛下誠深念高祖之苦醇法
太宗之治正己以先下選賢以自輔開進忠正致誅姦
臣遠放諂佞赦出園陵之女罷倡樂絕鄭聲去甲乙之
帳退僞薄之物修節儉之化驅天下之民皆歸於農如
此不解則三王可侔五帝可及唯陛下留意省察天下
幸甚天子下其議令民產子七歲乃出口錢自此始又
罷上林宮館希幸御者及省建章甘泉宮衛卒減諸侯
王廟衛卒省其半餘雖未盡從然嘉其質直之愚禹又
奏欲罷郡國廟定漢宗廟迭毀之禮皆未施行為御史
大夫數月卒天子賜錢百萬以其子爲郎官至東郡都
尉禹卒後上追思其議竟下詔罷郡國廟定迭毀之禮
然通儒或非之語在韋元成傳

兩龔皆楚人也勝字君裳舍字君倩二人相友並著名
節故世謂之楚兩龔少皆好學明經勝爲郡吏舍不仕
久之楚王入朝聞舍高名聘舍爲常侍不得已隨王歸
國固辭願卒學復至長安而勝爲郡吏三舉孝廉以王
國人不得宿衛出補吏再爲尉壹爲丞勝輒至官乃去
州舉茂材爲重泉令病去官大司空何武執金吾閭崇

通志

登伯

列傳十三

卷

薦勝哀帝自爲定陶王固已聞其名徵爲諫大夫引見勝薦龔舍及亢父甯壽濟陰侯嘉有詔皆徵勝曰竊見國家徵賢巫常爲駕徵賢者宜駕上曰大夫乘私車來邪勝曰唯唯有詔爲駕龔舍侯嘉至皆爲諫大夫甯壽稱疾不至勝居諫官數上書求見言百姓貧盜賊多吏不良風俗薄災異數見不可不憂制度泰奢刑罰泰深賦斂泰重宜以儉約先下其言祖述王吉貢禹之意爲大夫二歲餘遷丞相司徒光祿大夫守右扶風數月上知勝非撥煩吏乃復還勝光祿大夫諸吏給事中勝言董賢亂制度絲是逆上指後歲餘丞相王嘉上書薦

通志

卷宿

列傳十三

六

故廷校梁相等尙書劾奏嘉言事恣意迷國罔上不道下將軍中朝者議左將軍公孫祿司隸鮑宣光祿大夫孔光等十四人皆以爲嘉應迷國不道法勝獨書議曰嘉資性邪僻所舉多貪殘吏位列三公陰陽不和諸事並廢咎皆絲嘉迷國不疑今舉相等過微薄日暮議者罷明日復會左將軍祿問勝君議母所據今奏當上宜何從勝曰將軍以勝議不可者通劾之博士夏侯常見勝應祿不和起至勝前謂曰宜如奏所言勝以手推常見去後數日復會議可復孝惠孝景廟不議者皆曰宜復勝曰當如禮常復謂曰禮有變勝疾言曰去是時之

變常恚謂勝曰我視君何若君欲小與衆異外以采名君乃申徙狄屬耳先是常又爲勝道高陵有子殺母者勝白之尙書問誰受對曰受夏侯常尙書使勝問常常連恨勝卽應曰聞之白衣戒君勿言也奏事不詳妄作觸罪勝窮無以對尙書卽自劾奏與常爭言汙辱朝廷事下御史中丞召詰問劾奏勝吏二千石常位大夫皆幸得給事中與論議不崇禮義而居公門下相非恨疾言辯訟矯謾亡狀皆不敬制曰貶秩各一等勝謝罪乞骸骨上乃復加賞賜以子博爲侍郎出勝爲勃海太守勝謝病不任之官積六月免歸上復徵爲光祿大夫勝常稱疾臥數使子上書乞骸骨會哀帝崩初琅邪邴漢亦以清行徵用至京兆尹後爲太中大夫王莽秉政勝與漢俱乞骸骨自昭帝時涿郡韓福以德行徵至京師賜策書束帛遣歸詔曰朕閔勞以官職之事其務孝悌以教鄉里行道舍傳舍縣次具酒肉食從者及馬長吏以時存問常以歲八月賜羊一頭酒二斛不幸死者賜複衾一祠以中牢於是王莽依韓福故事白遣勝漢令上其子若孫若同產同產子一人於是勝漢遂歸老于鄉里所上男皆除爲郎漢兄子曼容亦養志自修爲官不肯過六百石輒自免去其名過出於漢初龔舍以龔

通志

卷四

列傳十三

五

勝薦徵爲諫大夫病免復徵爲博士又病去頃之哀帝遣使者卽楚拜舍爲太山太守舍家居在武原使者至縣請舍欲令至廷拜授印綬舍曰王者以天下爲家何必縣官遂於家受詔便道之官旣至數月上書乞骸骨上徵舍至京兆東湖界固稱病篤天子使使者收印綬拜舍爲光祿大夫數賜告舍終不肯起乃遣歸舍亦通五經以魯詩教授舍旣歸鄉里郡二千石長吏初到官皆至其家如師弟子之禮舍年六十八王莽居攝中卒莽旣篡國遣五威將帥行天下風俗將帥親奉羊酒存問勝明年莽遣使者卽拜勝爲講學祭酒勝稱疾不應徵後二年莽復遣使者奉璽書太子師友祭酒印綬安車駟馬迎勝卽拜秩上卿先賜六月祿直以辦裝使者與郡太守縣長吏三老官屬行義諸生千人以上入勝里致詔使者欲令勝起迎久立門外勝稱病篤爲牀室中戶西南牖下東首加朝服抱紳使者入戶西行南面立致詔付璽書遷延再拜奉印綬內安車駟馬進謂勝曰聖朝未嘗忘君制作未定待君爲政思聞所欲施行以安海內勝對曰素愚加以年老被病命在朝夕隨使君上道必死道路無益萬分使者要說至以印綬就加勝身勝輒推不受使者卽上言方盛夏暑熱勝病少

通志

卷四

列傳十三

七

氣可須秋涼乃發有詔許使者五日壹與太守俱間起居爲勝兩子及門人高暉等言朝廷虛心待君以茅土之封雖疾病宜移動至傳舍示有行意必爲子孫遺大業暉等白使者語勝自知不見聽卽謂暉等吾受漢家厚恩今年老矣旦暮入地誼豈以一身事二姓下見故主哉勝因敕以棺斂喪事衣周於身棺周於衣勿隨俗動吾家種柏作祠堂語畢遂不復開口飲食積十四日死死時七十九矣使者太守臨斂賜複衾祭祠如法門人襄經治喪者百數有老父來弔哭甚哀旣而曰嗟乎薰以香白燒膏以明白銷龔生竟天天年非吾徒也趨

通志

卷后

列傳十三

空

而遂出莫知其誰勝居彭城廉里後世刻石表其里門鮑宣字子都渤海高城人也好學明經爲縣鄉嗇夫守東州丞後爲都尉太守功曹舉孝廉爲郎病去官復爲州從事大司馬衛將軍王商辟宣薦爲議郎後以病去哀帝初大司空何武除宣爲西曹掾甚敬重焉薦宣爲諫大夫遷豫州牧歲餘丞相司直郭欽奉宣舉錯煩苛代二千石署吏聽訟所察過詔條行部乘傳去法駕駕一馬舍宿鄉亭爲衆所非宣坐免歸家數月復徵爲諫大夫宣每居位常上書諫爭其言少文多實是時帝祖母傅太后欲與成帝母俱稱尊號封爵親屬丞相孔光

大司空師丹何武大司馬傅喜始執正議失傅太后指
皆免官丁傅子弟竝進董賢貴幸宜以諫大夫從其後
上書諫曰竊見孝成皇帝時外親持權人人牽引所私
以充塞朝廷妨賢人路濁亂天下奢泰無度窮困百姓
是以日蝕且十彗星四起危亡之徵陛下所親見也今
奈何反覆劇於前乎朝臣亡有大儒骨鯁白首耆艾魁
壘之士論議通古今喟然動衆心憂國如飢渴者臣未
見也敦外親小童及幸臣董賢等在公門省戶下陛下
欲與此共承天地安海內甚難今世俗謂不智者爲能
謂智者爲不能昔堯放四罪而天下服今除一吏而衆
皆惑古刑人尙服今賞人反惑請寄爲姦羣小日進國
家空虛用度不足民流亡去城郭盜賊竝起吏爲殘賊
歲增於前凡民有七亡陰陽不和水旱爲災一亡也縣
官重責更賦租稅二亡也貪吏竝公受取不已三亡也
豪彊大姓蠶食亡獸四亡也苛吏繇役失農桑時五亡
也部落鼓鳴男女遮邈六亡也盜賊劫略取民財物七
亡也七亡尙可又有七死酷吏毆殺一死也治獄深刻
二死也冤陷亡辜三死也盜賊橫發四死也怨讎相殘
五死也歲惡飢餓六死也時氣疾疫七死也民有七亡
而無一得欲望國安誠難民有七死而無一生欲望刑

通志

卷宿

列傳十三

五

措誠難此非公卿守相貪殘成化之所致邪羣臣幸得
居尊位食重祿豈有肯加惻隱於細民助陛下流教化
者邪志俱在營私家稱賓客爲姦利而已以苟容曲從
爲賢以拱默尸祿爲智謂如臣宣等爲愚陛下擢臣巖
穴誠冀有益毫毛豈徒欲使臣美食大官重高門之地
哉天下乃皇天之天下也陛下上爲皇天子下爲黎庶
父母爲天牧養元元視之當如一合尸鳩之詩今貧民
菜食不厭衣又穿空父子夫婦不能相保誠可爲酸鼻
陛下不救將安所歸命乎奈何獨私養外親與幸臣董
賢多賞賜以大萬數使奴從賓客漿酒霍肉蒼頭廬兒

通志

卷后

列傳十三

三

皆用致富非天意也及汝昌侯傅商亡功而封夫官爵
非陛下之官爵乃天下之官爵也陛下取非其官官非
其人而望天說民服豈不難哉方陽侯孫寵宜陵侯息
夫躬辯足以移衆彊可用獨立姦人之雄惑世尤劇者
也宜以時罷退及外親幼童未通經術者皆宜令休就
師傅急徵故大司馬傅喜使領外親故大司空何武師
丹故丞相孔光故左將軍彭宣經皆更博士位皆歷二
公智謀威信可與建教化圖安危冀勝爲司直郡國皆
慎選舉三輔委輸官不敢爲姦可大委任也陛下前以
小不忍退武等海內失望陛下尙能容亡功德者甚衆

會不能忍武等邪治天下者當用天下之心爲心不得
自專快意而已也上之皇天見譴下之黎庶怨恨次有
諫爭之臣陛下苟欲自薄而厚惡臣天下猶不聽也臣
雖愚贛獨不知多受祿賜美食太官廣田宅厚妻子不
與惡人結仇怨以安身邪誠迫大義官以諫爭爲職不
敢不竭愚惟陛下以畱神明覽五經之文原聖人之至
意深思天地之戒臣宣訥鈍於辭不勝卷卷盡死節而
已上以宣名儒優容之是時郡國地震民訛言行籌明
年正月朔日蝕上乃徵孔光免孫寵息夫躬罷侍中諸
曹黃門郎數十人宣復上書言陛下父事天母事地子
養黎民卽位以來父虧明母震動子訛言相驚恐今日
蝕於三始誠可畏懼小民正月朔日尙恐毀敗器物何
況於日虧乎陛下深內自責避正殿舉正直求過失罷
退外親及傍仄素餐之人徵拜孔光爲光祿大夫發覺
孫寵息夫躬過惡免官遣就國衆庶歛然莫不說喜天
人同心人心說則天意解矣乃二月丙戌白虹虹日連
陰不雨此天有憂結未解民有怨望未塞者也侍中駙
馬都尉董賢本無葭莩之親但以令色諛言自進賞賜
亡度竭盡府藏并合三第尙以爲小復壞暴室賢父子
坐使天子使者將作治第行夜吏卒皆得賞賜上冢有

通志

卷宿

列傳十三

書

會輒太官爲供海內貢獻當養一君今反盡之賢家豈
天意與民意邪天不可久負厚之如此反所以害之也
誠欲哀賢宜爲謝過天地解離海內免遣就國收乘輿
器物還之縣官如此可以父子終其性命不者海內之
所仇未有得久安者也孫寵息夫躬不宜居國可皆免
以示天下復徵何武師丹彭宣傅喜曠然使民易視以
應天心建立大政以興太平之端高門去省戶數十步
求見出入二年未省欲使海瀕仄陋自通遠矣願賜數
刻之間極竭翬翬之思出入三泉死亡所恨上感大異
納宣言徵何武彭宣旬月皆復爲三公拜宣爲司隸時

通志

卷四

列傳十三

五

哀帝改司隸校尉但爲司隸官比司直丞相孔光四時
行園陵官屬以令行馳道中宣出逢之使吏鉤止丞相
掾史沒人其車馬摧辱宰相事下御史中丞侍御史至
司隸官欲捕從事閉門不肯納宣坐距使者無人臣禮
大不敬不道下廷尉獄博士弟子濟南王咸舉幡太學
下曰欲救鮑司隸者會此下諸生會者千餘人朝日遮
丞相孔光自言丞相車不得行又守闕上書上遂抵宣
罪減死一等髡鉗宣旣被刑乃徙之上黨以爲其地宜
田牧又少豪俊易長雄遂家于長子平帝卽位王莽秉
政陰有篡國之心乃風州郡以罪法案誅諸豪傑及漢

忠直臣不附己者宣及何武等皆死時名捕隴西辛興丞與宣女婿許紺俱過宣一飯去宣不知情坐繫獄自殺自成帝至王莽時清名之士琅邪又有紀遂王思齊則薛方子容太原則有郇越臣仲郇相稚賓沛郡則唐林子高唐尊伯高皆以明經飭行顯名於世紀遂兩唐皆仕王莽封侯貴重歷公卿位唐林敷上疏諫正有忠直節唐尊衣弊履穿以瓦器飲食又以歷遺公卿被虛偽名郇越相同族昆弟也竝舉州郡孝廉茂材數病去官越散其先人貲千餘萬以分施九族州里志節尤高相王莽時徵爲太子四友病死莽太子遣使視以衣衾

通志

卷宿

列傳十三

癸

其子攀棺不聽曰死父遺言師友之送勿有所受今於皇太子得託友官故不受也京師稱之薛方嘗爲郡掾祭酒嘗徵不至及莽以安車迎方方因使者辭謝曰堯舜在上下有巢由今明主方隆唐虞之德小臣欲守箕山之節也使者以聞莽說其言不彊致方居家以經教授喜屬文著詩賦數十篇始隃麋郭欽哀帝時爲丞相司直奏免豫州牧鮑宣京兆尹薛修等又奏董賢左遷盧奴令平帝時遷南郡太守而杜陵蔣詡元卿爲兗州刺史亦以廉直爲名王莽居攝欽詡皆以病免官歸鄉里臥不出戶卒於家齊栗融客卿北海禽慶子夏蘇章

游卿山陽曹竟子期皆儒生去官不仕於莽莽死漢更始徵竟以爲丞相封侯欲視致賢人銷寇賊竟不受侯爵會赤眉入長安欲降竟竟手劍格死世祖卽位徵薛方道病卒兩龔鮑宣子孫皆見褒表至大官

通志

卷一百

列傳十三

七



